

兩浙輶軒續錄

兩浙輶軒續錄卷四十五目

孫念祖 沈 璜 徐爾麐 馬文華

周光祖 傑 純 沈文元 章廷彥 錢 雍

張筮元 李文達 鍾際時 陳其泐 陶 才

吳爾堯 魯邦煥 朱清藻 童履康 王 棻

吳兆樑 楊思振 萬同倫 王英瀾 王英濤

王鏡元 孫憲祖 唐福履 來 福 周錦藻

王樂雖 邵懿瑞 王彥起 張蔭渠 董紹舒

錢繼祖 周向辰 李日章 羅學澄 褚榮槐

楊象濟 陳其炯 姚宗誠 陳爾幹 趙之謙

蔡以瑩 蔡以珍 沈文煒 蔡保東 顧壽楨

張錫恩 李 煊 王星誠 吳宗麟 何紹章

包如春 丁兆奎 李成善 錢喆 俞洵慶

何豫培 姚蘇溫 豐王 鉞 胡濱

余瀚 王元智 楊德榮 婁業煊 王澍

周人吉 錢守初 蔡濤 王毓勝 王尙忠

萬方煦 童大野 王錫康 湯學洙 勞銘之

沈貞

兩浙輶軒續錄卷四十五

督學使者潘衍桐訂

孫念祖

字心農號淶湖步康孫會稽人咸豐己未一甲二名進士官翰林院編修

孫德祖曰先從兄登薦後留京師十年始得第先此一取教習再取國子監學正學錄由學正試內閣中書及以編修送御史試皆第一以御史

記名未任壬戌考差荷特簡典試山西旋拜督學湖北之

命使事未竣以母憂歸叔父又棄養未及一年哀毀卒年甫

四十自以身被

兩朝特達之知未效豪末謂死有餘恨生平長于臺閣文字

稷體詩古文不多作作亦不甚經意也

題章子璵小影

君年四十二我年二十六同作天涯奔走人位置此身無定局我恨少無知君憂老將至把臂談素心情話同夙契小影誰所圖勸我贅一詞含毫不能寫披圖斟酌之大造可以作爐鑪鼓鑄羣倫屬吾輩不然神龍走風霆霖雨蒼生方足志

胡爲作此烹茶洗硯圖甘心石隱淪菰蒲於戲兮噫嘻圖成之時知何時無乃珠光劍氣鬱不發激成遐想入非非我狂歌君扼腕把酒問天天不管古來大器皆晚成我有一杯爲君勸勸君且投班超筆科名原不關學業司馬相如稱絕才郎官乍可以貲得勸君漫著祖生鞭不須白髮愁華年我聞謝傅年四十東山擁鼻猶高眠吁嗟乎富貴逼人假手英雄早年多不偶與君且煮一斗酒搔首向天開笑口

沈

璜

字竹虛錢塘人咸豐己未進士官戶部主事

浙江忠義錄璜少穎慧有神童稱咸豐九年成進士觀試戶部乞假歸里十年賊犯浙璜聞城陷從容謂家人曰余已受

國恩義當死爾等宜各自盡毋爲賊所辱弟姪妻子眷屬十

一人璜坐視各縊

死後亦自經殉難許善長曰吾師竹虛先生通籍後官京師聞家鄉兵耗乞假歸庚申之變全家自盡師亦死讎生平著述自出

機杼清剛雋上不同凡響  
亂後無存僅存少作數首

西湖櫂歌

短笛新翻水調腔  
魚娃多住白蘋汀  
一生不識風波惡  
人與鴛鴦總是雙

日高解纜故遲遲  
自向船頭理鬢絲  
不是曉妝波作鏡  
要將眉樣較西施

畫桡如飛盪夕曛  
好風吹亂鬢邊雲  
扁舟掉入花深處  
人共芙蓉兩不分

一點雲陰淡漸消  
娟娟月子畫良宵  
秋來頗動團圓思  
不許郎船泊斷橋

汪水雲碎琴歌

念家山破宮苔秋  
六宮掩泣臙脂愁  
故國茫茫天水碧  
鍾儀

甘作南冠囚當年供奉入天府自製新聲爲君譜琴師豈少  
太古絃趙家已無乾淨土江邊忽報白雁來何止金甌缺難  
補負囊不辭萬里行燕山雪滿邊歌苦離騷一曲天爲愁彈  
不成聲淚如雨南歸催餞梁園春陽關別調悲宮嬪忽然變  
徵裂金石一聲擲地揚飛塵桐枯玉折紫鸞泣孤臣碎琴如  
碎身舊物惟留賜硯在斧柯片石隨遺民君不見思陵琴士  
號黃震日賜黃金被親信同是宮庭待詔人惟君蕉萃凋雙  
鬢吁嗟乎文山琴絃絃迸露正氣吟疊山琴聲聲訴出卻聘  
心文山疊山埋碧血水雲之琴從此絕

徐爾麐

原名醇澤字潤生號簾齋業釣子仁和人咸豐己未進士官翰林院檢討

杭郡詩三輯潤生少孤受母陳孺人訓與兄懋齋孝廉  
聯燈共墨詩文並勝館選後聞家鄉寇警亟歸奉母遠  
避秦中時兄先不祿母老弟病不忍離主講夏縣涑水  
書院者數年乙丑補散館授檢討中年殂謝未竟其才

米書第一山摩厓歌

玉龍擘險蒼厓裂環嶽羣峯挺奇傑巨靈縮手不敢擎留與  
書顛鬪雙絕南宮一老海鶴姿愛山成癖書冠時到此徘徊  
發幽賞揮灑大筆爭淋漓煙雲過眼星霜換片石千秋傳逸  
翰行客徒欽渴驥才游人那識登鼇歎鳳城靈境擅人寰天  
目雄支衍此山直向壺中縮蓬嶠仙巖雲洞羅煙鬢米公賞  
鑑古無比三字留題足昭美定勝泗濱山上晉陵家石折沙  
埋易銷毀君不見名園遺刻賸琴臺龍井豐碑照綠苔尙想  
明湖三十里舫牽書畫載詩來松關徑僻疑塵外古碣摩挲  
心有會徧揭題厓著硬黃鷗波其次元章最名勝登臨翰墨  
緣情游一覽空目前有人獨寄千霄志絕頂文章李謫仙

元妙觀訪蜥蜴碑歌



天目西瞰金牛湖千年奇氣沈雄都宮門蜥蜴醒殘夢錦城  
華殿淪榛蕪寺宇厯代互興廢滄桑萬變曾須臾片碣相傳  
自吳越漫漶疇得明眞誣我思錢王重眞教浮圖舍利輝金  
塗防風胥母並立石炳著紀載文遐敷此碑敕建或曩日焜  
燿土木昭休符信有遺愛及遺物山門永護珍琳瑜命名者  
誰亦深致象形取肖窮錙銖竭來摩挲事幽討披剔藤蘚蹲  
龜趺坐瓊握槩那可辨非蝌非蚪非蜺螭風霜銷鑠溜侵蝕  
一色但作青模胡或言碑出李邕撰攷古辯論滋分驅碑原  
沒字人戴德脫非錢氏安取諸彭城功業震氓庶口碑不泐  
垂三吳表幢賜券各珍襲引重豈必爭區區吁嗟乎王世逮  
今八百載兵燹不擾完膏腴黃腰羅鳥亦代有錢江波靖無  
覬覦僥倖豐碑得貽遠江上冷閱吳山隅揖石更前一致問

當年保障謀何如

題北齊刁玉奴雲峯山四疏搨本

鄴州璽沒豪門圯豔骨嬌魂呼不起灰劫雲峰墮片陰墨痕  
香漬桃花紙疏尾名僉刁玉奴玉奴家世擅名都三枝並秀  
連城璧一笑輕輪計斛珠流離別恨唬鵲血紅顏竟入青衣  
列卻扇欣隨七寶車抱衾分綰同心結清歌曼舞愜新歡助  
采承嬌樂事寬自分棲鸞生有幸那堪打鴨惱無端雲翻雨  
覆情何定倉皇屏逐連姬媵碧海三生恨莫填靈山一禱誠  
能應玉宇新秋月正中鈿車重返舊房櫳圓成好夢鳩難妬  
巧占香巢鵲已空一從鄭氏平頭配蛾眉獨得垂憐愛閒階  
長種竹團欒別館新開花姊妹擊節普梨歌一曲美人豈惜  
千金贖女弟榮分飛燕恩諸姨豔鬪楊家屬其閒寵幸依稀

記玉釵翠鈿超倫次宮絃絕後續幺絃麟膠特出檀郎意文  
裾繡悅增華飾女君位踐慚何德回憶當時淪落情扶持倍  
感慈雲力此時精舍迷祇園此際宏施布梵門願乞有情登  
豔福何嫌近事儷華言六朝宮樣文章好麗句連翩工屬稿  
丹槩伊誰獨護藏瓊觀詫見詞林寶人閒金粉易成塵青史  
推尋感莫伸皇建紀元時既誤不知司史定何人姓名豈必  
留追慕星移物換難詳據從今佳話說千秋賴有深情傳四  
疏啟篋披吟錦繡篇拈毫惆悵綺羅緣秦宮寶鏡唐宮襪一  
樣繁華怨逝年

施應藻

字仲文號箏秋仁和人咸豐己未進士官兵部主事

題丁壽橋

慶成

鋤經圖小影

覓得桃源別有天欣欣雞犬亦皆仙披圖便覺歸耕樂疑脫

朝衫學種田

馬文華

字煥卿仁和人會稽籍成豐己未進士官吏部上事著補陀室遺稿二卷雜著二卷

府志文華通籍後官銓曹廉介自勵在郎署幾三十年境遇蕭然泊如也作詩專寫性靈不事雕琢辛酉以前皆毀於兵中年後投贈之篇多不留刻墨其孤校輯叢殘僅存遺詩雜著數卷而已

詠蟹

用九蟹全韻

東籬菊正華開樽思霜蟹寒宵一燈涼湖田斷編矮亥市聽  
爬沙屈曲竹筐擺雄以鯁鱧稱雌名博帶買尖團宜並探累  
串歸挂拐登筵香伴橙侑箸味選蕡盤飧自足媚口腹苦難  
罷橫行必遭烹羣醜嗟愚駭使者號江湖泥穴占溲澥擁劍  
臂勝螳森戈冠聳廬內躁性比狙外撓斑披獬怒眈雙睛瞠  
鋒厲入跪躡介冑空衛防輸稻類亦夥網牢縛渠魁斗大聚  
觀駭游金紛枝撐熬波劇譟駭假王醢彭越大俠族郭解難

逃炙背紅枉恃爪錚錯何如尙文章入夢殊瀟灑差幸無監  
州留髡弛規楷持螯醉陶然甜鄉覓黃嬭

錢武肅王犀弩軍凱旋饒歌

子胥羞文種怒欲挾吳山入江去雷霆決盪馮夷馳蛟螭奔  
騰陽侯助不睡龍作錢唐鎮妖鳥潛蹤威風震築高樓瞰迥  
灘弦月滿鏃星攢吳越之民慶安瀾

天地青煙波紫六丁亂決銀河水罌鐵煉成三千矢雄軍儼  
屯八百里水勢愈驕弩愈強雙門鼓氣萬騎驤俄焉氣竭鯨  
鯢藏木塘終古互鼉梁

隱怪現犀然渚狂瀾挽犀製弩石槌鉅輪餘勇賈長隄高建  
鐵幢浦背水列陣營門開望麾避舍勅敵摧沙平兩岸斷鎬  
堊

紅旂豎錦衣旋海上納土王威宣素車白馬神志懾腰鼓城  
輦金甌堅鳳舞龍飛十四州江山保障自千秋銅鈴枕功孰  
侔鐵券賜績常留石鏡照出真冕旒伏波不數新息侯

冷泉亭觀瀑

一徑入寒翠眾音響琴筑冷泉瀏其清有亭傍修竹巨靈手  
擘青山坳豁然萬斛珍珠拋須臾畫斷翠微濤聲直走長  
松梢亭旁仰睇天一綫千尺懸崖虛半面作勢噴薄耳欲鳴  
水簾倒挂目更眩嗚呼驚峯何年始飛來彫鏤萬象洞宇開  
泉飛作雨風力助山意搖搖怕飛去

許真君醮壇步虛詞

絳都縹緲接蓬萊仙籙頻將玉匣開底事綠章連夜上鶴輶  
親駕紫雲來

偶因射鹿悟真修時向崑崙汗漫遊曾侍玉皇香案側金經  
添得度人箒

竹符置水術通神道濟於今復幾春一自鳬飛雙鳥後便從  
充圃御斑麟

卻看擁舵躍雙龍南抵瀘江憶昔蹤好向三清傳法要棲真  
長住紫霄峯

妖夢圓來事已非飛枯聊爾腐仙機舊時道侶相邀慣看劃  
江流羽扇揮

仙籍名通列上清降鸞重認令威城瑤壇齊唱雲華曲遠聽  
霜鐘九乳鳴

周光祖字錫侯號雪齋師瀛孫山陰人咸豐己未進士官刑部主事著臨白集一卷

李慈銘傳略君少慧從大父竹生先生受詩又爲鄆雪舫先生壻遂專精韻語平居議論踴厲風發有志於用

世經歷滄桑意氣摧沮以

乙丑夏卒年甫五十也

沈寶森序略先生生長世閱胚胎前學讀書必規其大

亦既歷金門翔木天駿駉向用矣卒之磨揉遷革輾轉

曹部不得行其志不數年而故鄉猝陷寇難乃益佯狂

奔走不自惜窮愁抑鬱無聊不平之氣時時發於篇翰

猶復緘膝鏑篋深自韜晦迨寇氛掃盡日

月重光而先生已憔悴憂傷老且病矣

王繼香跋略先生承祖庭之詩教浸淫涵泳溫然粹然

胃中絕無名利之見得賢配鵠小霞夫人唱和園林池

館復足供遊息故其爲詩冲和澹遠不爭奇不關勝若

不欲以詩鳴者昔楊綰作文恥於自白非知已不可得

見先生以恥自名

其詩殆此意歟

孫德祖曰雪廬有前後山居詩各六首止軒編修錄摘

句不下百聯皆卓卓可傳世限于篇幅恨不能備錄也

### 冬青行

餓虎倔強真龍僵妖星閃爍含鋒芒珠襦玉匣竟成土龍骨

暴露難收藏宋陵之慘古無匹精魂訴天天不恤毒霧橫空

蔽天日陳死功臣有誰出唐義士林義士把酒悲歌崛然起



長風吹骨寒森森龍身酣睡從今始意欲化作雙吳鉤  
砢然斫斷楊髡頭割取心腑爲脯脩然後再拜奠荒邱  
樹梢月黑風颼颼故鬼新鬼消煩憂乃可一雪千古仇  
吁嗟乎蒼天自有判如鐵寶刀不汗妖僧血妖氛盪盡  
天眼開人閒始識冬青穴冬青枝挺高節風雨年年寄  
哀咽冬青花白於雪開傍雲霄不堪折此中應有義士  
魂夜來星淡潮聲吞天章寺裏佛鐙滅破帽殘衫朝至  
尊我來弔古動悲感草色愁人水流慘穴前拾取冬青  
花吞入吟腸壯肝膽

### 金鄉守城歌

天命民牧牧我民民命爲重土地輕不惜烈士死守城  
但惜萬家枯骨鑄一名君不見腥風吹血古繙國壞雲  
堆作死灰色城西茂林起大賊椎牛醢酒夜饗客洵洵  
大地聲悲號金

鄉縣令禁勿囂縱賊激賊非上策殺賊以計不以力聯民保  
甲教民勇軍令如山撼不動四面伺賊賊心恐舉酒屬民民  
氣竦願竭精血償民殃豈借民生抵

天寵白旗血染猩猩紅一時平賊成大功擢以州牧

天眷隆各執酒漿來別公涕泗灑天爲白虹嘉慶癸酉書此  
事公陽湖人成進士吳階其名禮石字

青藤歌弔徐天池先生

才人枉死留其名不如草木旣死而又生卽此青藤枯復榮  
使人藤下難爲情我聞風雷夜半警詩魄造物忌才更忌物  
古藤剝落新藤生想見奇才不能屈當年大醉呼戟門諸生  
壓倒公侯尊歸來潑盡一斗墨龍蛇直挾波濤奔吁嗟乎窮  
愁身世何足論恃此輪囷奇氣蟠乾坤天池不涸藤不死花

開招得先生魂涼煙濛濛一窗白章侯死後誰爲宅我來弔  
花花不知院落無聲墜寒碧

歸自京師訪周叔雲留飲東澠州堂醉賦

常禧門外湖水平水鷗拍拍飛向城我來芝村訪舊侶主人  
倒屣前出迎記曾千里走荆棘欲望江南隔江北揚州城上  
火雲紅金陵渡口風沙黑君獨高眠鑑水濱春船白藕秋船  
菱灣頭鯉魚寒可罾世事問之百不應君家伯仲能詩者詩  
成並付阿咸寫冥搜巖壑富千言橫捲煙雲歸一治鄰家釀  
熟香滿天攜來揖客金樽前高陽酒徒喜欲顛劉伶醉死李  
白仙比聞河北賊驚走故人金印大於斗吾以樽散全吾天  
歸來兀兀但飲酒今年豆麥十倍強天心或者寬民殃會當  
種秫七百石與君大醉三千場

寄丁韻琴

百里相望感索居  
夏侯絲竹近何如  
綠楊畫舫春攜酒  
紅燭風簾夜校書  
結客誼高貧賤日  
苦吟身老戰爭餘  
何家自是耽通隱  
不效興公賦遂初

送尊客養疴柯山蘿庵

初月藤蘿夜空山  
艸莽臣新詩多是淚  
病骨不勝春野鶴  
無儔匹閒鷗結比鄰  
斯才應大用珍重苦吟身

訪徐芸臺秀才

慶辰

不遇口占

柳橋東畔少人家  
倚醉歸來每日斜  
只有伶俜黃蛺蝶  
涼秋卻抱水蘋花

王貞女詩

并序

貞女名栗馨號月裁其良奧曰金春疇年十六于歸

有日而春疇卒恆懊咿愀愴居有頃媒妁稍稍來則  
啜泣不食父母慰諭乃已未幾舅歿姑嫜居女請於  
父母願歸金氏以素輿迓歸徐鐵孫太守表其閭  
曰儒門貞女事姑垂十年卒於咸豐三年四月年二  
十有五按狀少好關覽樂善不倦尤惓惓於忠孝節  
烈事嗚呼貞潔之性其殆天授耶

瑯琊有貞幹冰月不改容何以寫悵悵獨繭儷孤桐未奏清  
廟絃金徽摧秋風涼月上山脊隻影摩晴空寒泉流酸聲幽  
咽對蒼穹幸謝斧柯手心死無可同

黃雀兒

黃雀兒結巢庭樹枝羣雛啞啞常苦飢汝亦麤氈不得肥神  
州赤縣足稻粱胡不去此天涯飛黃雀嘒嘒作人語請余旅

食抑何苦爾翁短髮客江浦山妻伶俜守門戶兒女咿嘸索  
烝糲干戈千里何年聚噫吁噉風沙莽莽吹上衣孤月皚皚  
光入扉菁羹橡飯願亦足長安游子須早歸

紫金山

見說金陵賊勢孤旋聞烽火逼三吳沸騰千里心難卜籌策  
頻年事已紆薊北材官多壯武江南寸土盡膏腴干戈滿地  
歸何日白眼青天一酒徒

烏棲曲

深宮挾瑟思華年城頭擊鼓聲闐闐烏棲老樹雪沒脰吳王  
醉倒西施醒

酬孫子九

杜老長纔歌莫哀扁舟相訪白雲隈三年烽火謀生拙萬里

風濤省墓來亂定遭逢成白首閒中物色有奇才

謂秦秋伊王訪梅孫

彥清馬幼 卽今皋社新詩卷可憶雲門舊酒杯

傑 純字碩庭杭州駐防蒙古鎮白旗人官乍浦副都統諡果敏

浙江忠義錄傑純洞曉戎律得士心歷任將軍皆倚重  
之咸豐十年守滿營身先士卒露宿壁壘援兵至賊將  
走傑純怒馬先出闔營從之與外兵夾擊賊披靡遁去  
事平功最高將軍瑞忠壯悉以軍事界之擢甯夏副都  
統未之官改乍浦副都統仍留佐軍十一年九月賊大  
至城中主客兵勇尚數萬人巡撫主堅壁守不出戰純  
率部下及所募西湖人列礮船結水營湧金錢塘兩  
門外賊沿南山來日出擊之飢困益甚乃殺一馬一牛  
鬻分之得豆一斗刳分之故士感激無叛志相持至十  
月賊掠得小舟與水勇戰於六橋上下賊據湖心亭傑  
船往爭之不得水營遂潰十一月杭州破死之傑純挽  
鬚策騎奮不返顧子城破突圍出言全家死事人咸哀之  
先得所歸矣次子城破突圍出言全家死事人咸哀之  
緝雅堂詩話果敏誦馬詩有云如此英奇誰可偶  
其人生臥不言功其詞尤勁成仁之志蓋早定矣

懷王東冷 漢軍人協領王度之

商遊幕四方善書

墨盡千石螺竹盡萬山紙謹守梁不翁一滴乳入水劍器舞  
公孫變化獨奇詭

懷吳鳳池

鑲黃旗人學李如梓善畫人物其雲龍尤妙

奇逸雲中龍見首不見尾遐哉鳳池子風儀特奇偉落筆信  
有師可以警神鬼

懷單武

正藍旗人居太學街爲人豪爽精於琵琶飲酒藝梅菊亦能畫學楊半嶺得其傳

單生有絕伎人稱琵琶仙秋月瑟楓荻四條清冷絃凌人獨  
豪邁斗酒雙旄肩

懷白慶齋

鑲黃旗人曾任蒙古協領習六壬老而好釋家言猶能開十石弓八十歲無疾終

靈棋存其文焦京兩無術六壬窮理蘊知來若符節逃禪香  
一爐娛老弓十石

沈文元

字鷺洲錢塘諸生



夏日湖上雜興

櫓聲入湖去一櫂出蒹葭斜照滴山淥好風吹藕花句留新  
罨畫疾痼舊煙霞清興未云已惱人聞暮笳

華屋盡零落放懷酒且醺四山雲外立雙鏡水中分荒墅葛  
仙嶺生香蘇小墳誰家吹玉笛搖曳滿湖聞

我愛林處士千秋俎豆閒敲門無熱客高臥有名山淺水亦  
澄淨閒雲自往還曉風催月上眉樣一痕彎

莫問當年事荷花桂子秋亭臺新粉飾褰屐舊風流我欲扣  
舷去因之散暮愁塵氛不可卻浩蕩愧沙鷗

重建白蘇二公祠

葑隄濃綠湖波染吏隱仙心渾不遠提唱宗風宋繼唐修明  
祀事秦勳阮湖山俎豆已年年風馬雲車總宛然紅袖青旂

思晴好銅琶鐵板想詩篇無端小劫紅羊遇荆榛塞斷孤山路碧瓦朱甍盡渺然夕陽荒草驕狐兔楚北雄師復鳳城游人重喜見昇平珠簾畫棟新祠宇白傅蘇仙其兩楹遺愛千秋今宛在名香一瓣行人拜香山詩集接眉山江山故國增文采

章廷彥

字子辛仁和人廣東候補知府著清風明月軒詩鈔

夏敦復曰先生世守清芬初官餘姚訓導甄育士類原論翁然後改官廣東知府不數年歸湖舫清尊吟歡自適

艮山門外辨利院瞻禮大士畫相

海南雲湧天風高何年吹墮依僧寮寶相幻作珠林緇煙雲供養羣靈朝溯自憬使竺蘭遙白氍圖續優填標後來傳工鏤雕白衣感應神尤超阿縛羅枳多宣昭伊溼伐羅義蘊

包持呪鑠落連營牢陣北諷唄回弓刀入險免脫同猿猱南  
澗多寶夢境邀金容明滅電流影種種靈異精誠招道元十  
幅披雲綃楊坦資聖眸動搖焚香頂禮盟手描不數安道張  
僧繇辨利院僻循東郊法堂懸像凌雲霄石倉舊藏劫簸消  
王瞿供奉珍瓊瑤西林移此安禪庠編錄小志相傳鈔畫相  
義橋王氏質庫王茨檐先生曾祥館其家贖供於靜便齋中  
時僅三十餘幀吳西林先生穎芳復移辨利院相繼捐施盡  
相今有百數十幀之多又凍園募疏守不祧園先生疏文詳  
纂辨利院小志板藏院中其始末向未刊春秋二仲十九朝百二玉軸耀璿杓厯代名手如聯  
鑣裴潢不辨真贋淆畫又高揭列蘭橈但覺滿室香華飄或  
結跏趺蒼厓凹或倚鉢羅觀海溝或坐金蓮花葉交或貝手  
眼紛揚翹更有蜚穢彈翠髻華鬢瓔珞何髟髟脫閣幢蓋雲  
垂脣臂吒般遮和威韶眉際光明舒白毫忽現面門顯顚顚

一喝座前獅子哮三十六相占變爻是相非相兩幻泡影響  
化宇被甄陶咫尺應身游沆寥人天慧眼雲水淘大千世界  
咸周遭俯愍眾生徒煎熬慈航覺海平無潮問誰穀穀生緣  
拋畫工臨樵心手勞一著色相如鈎膠作詩呈佛佛亦嘲有  
如夢囈醉語謔我來合十福匪徼聊紀梵蹟慚鼃咬荃蘂芸  
梔僧能教慎勿通靈隨飛飄應機三昧聞茶瓢迦陵妙音來  
春皋

錢

雍

字樂平號鹿坪仁和  
廩貢江蘇候補縣丞

杭郡詩三輯樂平具聳秀姿幼喜讀騷雅幽思哀豔往  
住流露筮仕就縣佐庚申告警與許芷淥大令延潤同  
由江蘇奉調回籍襄  
辦團練先後殉難

蘇臺秋柳用李靜軒韻

唱晚蟬聲力漸微南園風景尙依依強舒冷眼猶三起瘦損

纖腰又幾圍弱不藏鶯空嫵娜衰因對菊轉芳菲此身合傍陶家住世事從今與我違

響屨何人緩緩來香泥淺印半弓苔牽愁無復絲千縷送別惟餘酒一盃落日栖鴉嘯茂苑西風走馬憶章臺黃金散盡終安用翻說青春太不才

張筮元

原名祥號桐孫仁和諸生

抗郡詩三輯桐孫少年苦讀書法吳興胡書農學士推重師門攜往都中與孟紳昆仲共筆硯遂幕遊南北出居庸渡臺灣年老倦歸授徒爲活落落寡交庚申寇至挺梧逆擊賊賊輕其老爲所中仆於地忿甚被害尤慘

篷牕聽雨

不耽杯酒不耽吟瘦比梅花倚碧岑一夜聽殘篷背雨欲尋鄉夢海雲深

李文達

字竹泉仁和諸生

杭郡詩三輯竹泉少從汪虛谷游讀書能參其要書注  
宗松雪庚申後以烽煙迭警令家人分避於鄉人爲勸  
儲行者笑不行次年冬園台糧盡捐三千金助餉復輸  
粟數十石時閭巷一夕數驚竹泉躬率守望城陷巷戰  
力屈爲所執  
罵賊被戕

小園偕楊芷亭先生納涼

小園日涉閒大好夜午後疏螢點池蓮鳴蜩嘒岸柳涼生白  
紈扇酣飲碧筒酒主賓共陶然聯吟擊銅斗

鍾際時

字菊坡海甯廩生  
著靜觀書屋吟藁

陸宏瀚曰咸豐初葉菊坡橐筆游皖客阜陽幕中寇至  
同人皆去獨菊坡留助縣令城守寇乘夜襲城力禦卻  
之大府敘勞以  
州同薦未仕卒

晉陽道中

漏盡未成眠雞鳴欲曙天疎窗敲急雨危石瀉寒泉屋曠一  
鐙暗秋深萬慮牽明朝策歸騎漸遠太行巔

陳其泐

字桐舫海鹽諸生  
著嗣退耕堂集

傷時

人情若波瀾世道多反覆信義安足尙名利競相逐庸夫爭  
刀錐俗士徇爵祿擾擾雖一緒紛紛乃萬族循環有天運一  
往無不復淑之以聖教變化自敏速何哉阮嗣宗竟作窮途  
哭

古劍篇

鯨魚跋浪蛟蛇走元精入夜衝牛斗世閒寶物不終藏一朝  
物色風胡手憶昔良工鼓鑄成坐令鬼母秋郊驚有時深宵  
風雨泣匣中往往聞龍鳴魚文犀表真奇絕把酒相看肝膽  
熱悲來斫地一高歌鋒芒耿耿誰能逼吁嗟乎有恩須報讐  
可捐五文高倚雲霞邊胸中那有不平事搔首仰聞蒼冥天

陶

才

字非材海鹽諸生

家傳略先生善飲工楷法見有古書必手自鈔錄或于市肆購得殘本補綴成帙其好古不倦如此

秋日偕丁半閒金竹坡郊外晚步

秋色滿平野閒行薄暮天亂山橫落日老樹鎖寒煙喜有尋詩侶愁無沽酒錢歸途鐙已上分手野橋邊

吳爾堯

字松生一字自牧石門諸生

和橙齋叔種菜詩

叢生馬齒亂卑尊  
荏刺如鍼不可捫  
督促畦丁休泛愛  
恐防傾奪蕙蘭根

叮畦平整莫陂斜  
求討精嚴草不芽  
卻怕人嫌太分別  
故留野莧伴秋瓜

魯邦煥

字文甫平湖諸生箸睫巢詩草



傾脂河曲

金盆潑水罷華妝  
春波流出紅脂香  
西施一去不復返  
滿川煙草生寒光  
湖干斜日亂嘯鳥  
兩岸落花紅不埽  
鳥自長嘯花自愁  
妝臺寂寞流波渺  
憶昔臨波調豔脂  
濃妝淡抹總相宜  
河流漲賦傾脂水  
傾國傾城能幾時  
惆悵風流今已沒  
五湖何處沈香骨  
殘脂賸粉付東流  
空有寒波照明月

朱清藻

號定齋歸安諸生

感事

滿目瘡痍劇慘傷  
重城烽火照平岡  
守陴空灑三年血  
清野惟輸一月糧  
有限金縉投易竭  
無家兒女散成行  
亦知未了蒼生劫  
天半機槍又吐芒

童履康

字肅泉德清廩生箸聽雨小樓詩文集

家傳略喘泉家貧刻苦勵學以孝友聞鄉里髮逆起嘗  
作平賊十策及賊擾浙江米翔貴博采古救飢方親試  
之

育蠶詞

采桑結伴過橋東露溼弓鞋碧草叢一片綠陰人不見剪刀  
聲度剪刀風

香風正暖晝初長飼食關心日日忙待到蠶眠人亦倦矇矓  
春睡夢條桑

王 綦

字建堂號小舟慈谿人候選知府箸晚晴樓詩稿

苦戰行

弔定海鎮葛雲飛黃巖鎮王錫朋壽春鎮鄭雪鴻

刁斗聲死海氣惡烽火盡天霹靂作丸泥無計試東封

鄧守所築

土城不久已圯天上將星一時落四日四夜兵不休飛矢冒石城上

頭孤軍海外苦無援胡笳吹斷蛟門秋共道此戰勢莫敵愁

雲壓地天無日血忱牢結鄭與王歃血誓師共殺賊豈知天  
不諒忠精連宵淫雨飛孤城黑狐跳梁白狐嘯班馬蕭蕭慘  
不鳴西鄙之兵連北鄙兩地相依若脣齒賊兵閒道走陰平  
將軍力盡後先死咽喉要害古舟山峻嶺魏戟未可攀何事  
竟失曉風守無人爲斬樓蘭還生者三寸舌死者一腔血是  
誰惜死乘夜歸大錯難鑄六州鐵

聞葛公請兵守曉風督師不許卒以此失守

### 催租吏

前年島夷肆跋扈奔走流離劇困苦幸得稻粱大有年家家  
猶得稱安堵今年七月起颶風田禾厯亂如轉蓬八月狂風  
又大雨平疇漂沒無西東大風拔木屋宇倒大水浸禾同腐  
草人民之苦莫過此居無室家食無稻君不聞去年離亂猶  
未荒

九重有詔免官糧今年田禾遭惡歲酷吏索租如虎狼老婦  
典衣沽酒漿小姑殺雞作羹湯殷勤待吏吏不喜田家待吏  
何兒戲

觀戴軍門遣兵戍臺灣

將軍振威武風勁馬蕭蕭鎧火連營迴旌旗列陣遙弓弦鳴  
紫塞雕影落青霄回首句江月沈沈破寂寥

六言

一卷靈均楚語三尺伯牙素琴香草美人遺恨高山流水知  
音

諸葛綸巾羽扇羊公緩帶輕裘管樂漫評月旦江山終古風  
流

大江水流東去西山爽氣朝來塵尾隱囊舊物清風明月高

臺

吳兆樑

字卓軒  
奉化人

記侯烈婦

烈婦唐氏鄞侯慶培室業陶吳江壬戌八月  
甚賊怒刃之身無  
完膚以死吁烈矣

甚賊怒刃之身無  
完膚以死吁烈矣

家貧苦離亂何以全我生無地無豺虎插腳皆榛荆咫尺黃  
髭嶺老樹相交橫隻身匿其中祝鳥毋作聲此生痛何罪欲  
行不得行賊來一何速耀眼光明相逢苦迫脅我志誓不  
更罵聲振山谷一死完吾貞徧體被百創血染弱草莖風雲  
慘無色流水咽不鳴青山與有幸終古齊峻崢

楊思振

字漁簫山陰諸生  
署香祖山房

緝雅堂詩話

君室孫香祖字晚蘭心農前輩女兒也爲

旌孝

亦能詩與君唱和有對鼓樓聯吟稟並在室所著謬香  
居詩鈔俱燬于焚繼室同縣鍾廷彥字俊君著有秋

室詩藁惜無  
從訪來矣

次韻寄畚雲間林仲葵

道煒

歲月蹉跎付鬢絲  
便論晚達總難期  
彌衡懷刺渾無字  
阮籍空囊臘有詩  
七寶愁看修月斧  
九秋惜取傲霜枝  
多情卻感林公子  
猶自裁雲寄所思

明湖如鏡柳如絲  
曾裒枯桐對子期  
花好月圓長中酒  
水心雲意其弦詩  
幔褰青雀逢蓮女  
簪炙新鸞譜柘枝  
多少俊游彈指過  
不堪天海各相思

萬同倫

字仲桓山陰人官兩淮  
運判著補蹉跎詩存

吾廬

吾廬遠紛囂  
逍遙守元漠  
挾書就竹石  
吟嘯自爲樂  
微言存方策  
五厄踵秦虐  
六經裒叢殘  
遑論邱與索  
後儒門戶分箋

疏橫穿鑿縹緗高於山十語九糟粕羣言徒爾爲大道日星  
若有客頤而長軒軒骨如鶴搗腸五千卷平生無述作微子  
誰與歸壺觴且其酌

冠山

在龍里縣城中

城褒一峯秀淨居雲際開破鐘縣禿樹古佛臥蒼苔松石有  
禪意黽黽驚客來紫虛山名在何處高鳥日邊迴

紫柏山留侯祠

人生駒過隙自苦亦何爲幻想穀城石初心博浪椎赤松竟  
誰是紫柏有新祠事業報韓耳孤忠人未知

三烈詩

井水枯

爲大荔縣烈女彭見娥作女字陳同治壬

戌夏省舅氏於蒲城遶回亂會逼偶其黨女投簪井

中繼出罵益厲遂遇害

井水枯井邊碧血腥模胡女兒激烈羞丈夫女省舅氏蒼黃  
寇至突逢豺與狼強效鴛鴦與鴛羅敷未嫁自有偶彼有嬌子  
不可負狂賊那喻此窺井求速死蓮姿不受淤泥汚長繩縋  
出絕復蘇復蘇更奮常山舌白刃可蹈甘屠裂血痕漬草草  
亦勁餘烈猶能移物性

透拳爪 爲蒲城縣張烈婦作婦爲賊虜納車中誘  
以甘言婦奮爪裂賊面賊支解之

透拳爪纖手何難碎狂狡麟麟強同車行行復趨起何物腥  
羶敢如是撲殺此獠一彈指秦庭匕首博浪椎赤手空拳不  
敢揮奮袂攘衿輕生死滿前豺虎尋常爾嗟彼瑟縮粥粥雌  
狐穴偷生能幾時



金翦哀 爲白水縣蘇天純之妻連烈婦作天純禦  
賊戰沒烈婦不食防者偶疏以翦刺心死

金翦哀昔裁郎衣今自裁黃沙蔽日走豺獫丈夫豪作沙場  
魄痛哭向原野半粟不可下殷殷逆耳言屑屑胡爲者金翦  
如有知背人默致詞生爲獨活艸死爲連理枝生亦何樂死  
何悲但願借爾斷決地下長相隨

杜子祠

祠門頽平野煙樹紛蒼然終南鬱深綠遙落枯酒邊駕言數  
來游陰晴各清妍懷古敦所好追蹤邈無緣開尊足泥飲焉  
知坎壈纏雨後川原淨日午松陰圓幽篁送餘響入生疑鳴  
絃芄芃麥含秀青青接芳筵修翰悅林藪潛鱗樂深淵我亦  
諸侯客欲問桑麻田

古鑱篇 并序

瞿京之得古鑱臘有文曰吳季子之子永用鑱

延陵已死鑱猶是瓜皮黝綠閒深紫蚪蟠虵綰辨奇字寶用  
鑱者季子子瞿侯俠骨老未降匣底傲留一片霜借觀動魄  
竦毛髮六月序變深秋涼當時蘇臺走麋鹿王孫虎氣同潛  
伏後人好古窮搜羅什襲曾聞孫退谷函關使者今歐劉往  
年得之易以粟豈知有偶溷塵壒一經拂拭駭凡目莊生箸  
說徒詞雄何不手仗千元戎西垂斧斨正未已淬河厲嶽刻  
空同鉛刀尙思奏一割況乃神物非頑銅風雨蕭蕭雷隆隆  
精采直起舒長虹潼津西望光燭斗請看破壁翔雙龍

游華山

玉泉院

春暉動游興水石送明靚入門肌骨輕吹面山風冷蒼松老  
增妍清泉響逾靜川原納亭榭草樹扶闌楯希夷呼不醒幽  
洞闕雲影

蒼龍嶺

谷深風如雷古樹作人舞我乘蒼龍脊繇繇駭縣縷足底攢  
亂峰石外無纖土鞭龍龍不起酣睡自千古塵下多蒼生田  
閒望霖雨

題戴文節湯貞愍二公畫

并序

一題平橋晚色一題松亭挹翠合裝爲一

浩氣壯河嶽遺墨照日星當其下筆時坤軸恢縱橫偉哉爲  
霖手一寄巖壑情秋林含暝色風動流松聲二老今不作呵  
衛來山精請看咫尺閒時有蒼雲生

謁史忠正公墓

利鈍非逆覩君子爲其難孤城開府時務盡心所安一杯拱  
平野中有衣與冠梅開邱壠閒花下春風寒士女鋒鏑餘蚩  
蚩復游觀

題吳野人詩集後

野人名嘉紀泰州人託迹竈戶蓋隱者也

興廢忽經眼魚鹽託此身盛時無棄物遺老有斯人歌哭留  
詩卷飢寒蹈海瀕孤懷多苦調開裘一沾巾

讀史

誰洗平城七日羞和親幾輩借前籌長安竟築單于邸閒使  
皆稱博望侯繡闥銀錢邊塞市蒲萄苜蓿漢宮秋逍遙霸上  
諸軍老烽照甘泉吁可憂

王英瀾

字紫生號杏泉晚號景琰老人銘子會稽廩貢官鄞縣教諭著雙谿詩草

馬廣良傳略君幼孤自奮力學中年入賞得校官閤近  
世學校具形如蛻有意救正之所昏集諸生諄諄告誠  
以倫理月課胥核實士之有文行者戴之如骨肉庚申  
寇迫東湯民抗糧且圍城君輕騎諭解之格靖伯左公  
詩撫浙謂浙省校官稱職者二人君其一也遷鄞諭更  
著學校平議二篇為規準鄞士尤悅服君以多病習軒  
岐術精之嘗著醫辨如干卷督  
學侍郎萬公青藜為序付梓

小螺盦病榻憶語題辭

樂安盛文物才彥超東中慧根鍾機星組此錦繡胸仙毫垂  
月液神鍼奪天工倚與女長吉手把白芙蓉豈其赴玉樓抑  
或歸瑤宮湘簾富遺草一寸香塵封商音嗣徐華足鼎立芳徽  
光管彤名門多淑媛秀萼挺青松兒婦絕粒時問年還與同  
可憐冰雪姿濯夢空秋風大兒繼本疾卒兒婦殉烈年亦十  
九已膺旌典女史女姪也濯  
夢所居樓名梅叟詩有  
高樓辟穀憶冰姿句

白傳悼金鑾潘令哀金鹿人生到中年愛憐逾蘭玉興哀不

鍾情老淚飄撲簌暮雨敲虛帷魂晃一鏡綠枯坐憶言笑然  
脂寫盈牘魚緘遞海上新詩勝千幅哀哀感逝心展卷更振  
觸我亦有弱息幼字淮宗族歸骨悲女孀傳經妬老伏才殊  
情無異同聲付一哭

幼女繼樊字宗濂甫先生少子能尊  
去冬歿於雨齋宗氏迎匱歸葬先隴

酬李春皋閣學

品芳

卽和惠題宛委拾芝圖韻

先生家住東瀾東英年簪筆登閬蓬兩度蒼山秉玉尺至今  
文教傳瀕中黑頭歸隱鶴巖麓靜檢丹經和月讀杜門卻勸  
無人過獨我綦巾往還熟夜來五色飛雲章三薰三沐宜珍  
藏頓使丹青忽增采懸之虛室生吉祥一瓊忝擁芙蓉嶼名  
士名山都舊好相期同薈芝田雲呼龍分種恆春草

移任鄞校留別葵中同好四首

卅六芙蓉繞洞天

北山芙蓉峰道家  
稱第卅六洞天

天留勝境住頑仙詠樓

正卷看山幔風訊偏催下瀨船瀕海煙波鄰故里搏沙蹤迹  
悟前緣雙溪鴻印分明在偃指曾經十五年

老友古頑嘗爲  
子刻雙溪鴻印

印小

記從鼓棹上嚴灘片席長山媿素餐轉眄滄桑經浩劫重尋  
舊雨拓吟壇一官獨冷聊充隱四海論交盡締歡不繫虛舟  
原自在祇憐知己別離難

風雨荒齋歲屢更門前桃李盡敷榮七賢講學音誰嗣三洞  
看雲夢亦清書劒蕭閒秦博士衣冠揖讓魯諸生臨歧相勸  
惟名節豈僅鵬搏九萬程

垂柳輕舟盪夕暝驅歌唱徹悵離羣

同學諸子咸賦詩贈  
行并繪雙溪送別圖

家恰趁還鄉水投老慵爲出岫雲回首仙華峰縹緲

子曾攝  
浦江鐸

載三消魂祖帳話殷勤蘭溪煙景蘭江月

在鄞  
縣南

一種離情二水

分

王英濤

字念亭英瀾從弟會稽增生

哭姪婦孫烈婦

昔我曾祖淩節母苦節存孤昌厥後

曾祖母淩太恭人苦節撫孤族乃淩大

來孀獨存兩姑一歸姚室一字屠

從姊適姚君介臣守節三十餘年予妹字屠未嫁而

屠卒守貞家

居將三十載寒門自昔重清節竹林有婦更奇烈烈婦不徒

以烈稱冠之以孝乃雙絕妾欲代夫天不允妾父哭塋命亦

盡妾身未亾妾何忍況復翁姑皆康娛妾又膝下無遺孤妾

身獨活妾何愚吁嗟乎婦年止十九婦名垂千年絕粒不毀

體孝烈乃兩全從父從夫夜臺側耿耿此心貫金石在天冰

霜地松柏君不見

九重褒榮光綽楔旌節祠中繇血食曹娥諸娥與鼎立



王鏡元

字庸吾會稽廩生  
箸隨所遇齋詩行

癸未七月得秦敝老吳景喬寄詩賦謝

一寮睡足振宗風無意求工自在工君以淮海後人箸  
有小睡足寮詩集溫李

芊縣坡谷秀固應獨步大江東

南湖可許再來游七載知交幾鷺鷥強半題名丁卯集至今

橋水咽寒流

孫憲祖

字越吾號月湖念祖  
季弟會稽附貢生

孫德祖傳略月湖詩筆佇興而作惟以自娛未嘗示人  
故人亦罕知之者喜爲制藝清剛雋上未有其倫咸豐  
己未鄉闈十四藝並破的以仲兄新及第隸官卷限于  
額被放不以爲恨謂其人曰經義說經六籍以來文字  
莫大乎是自有以之獵富貴者而此物遂爲下流之歸  
矣自是不復取應年五十以明經終季父挽之曰有才  
可惜名心  
淡盡之矣

秋日小集娛園次主人韻

秋山媚新暉擎舟吾行獨故人與我期煙波涵老屋入門誰

主賓不事衣冠肅幽花紛階砌青紅何簇簇明窗延晨曦筆

硯亦流馥圖書張四壁古氣增靜穆素心澹忘言乍展陶詩

讀翩翩來驚鴻時有訪筮者索看扞見頗蜎縮一笑轉譁卸

有約竟忘夙須臾開觴詠平章絲竹肉大嚼媵高譚珍饈襍

野簌人生懽幾何斯言良可服叶還當就菊來不使塵眯目

唐福履宇坦侯號乙笙會稽剛貢箸會稽山人詩存紅杏山房遺藁

沈燕曰乙笙性不喜修飾裘帛未嘗挂體嘗鐫會稽布衣小印以寄意爾入河南臺灣幕府章奏冠時彥名公卿多傾慕之

仲春中

游藝圃文文肅震孟姜貞毅堞故居

也次汪鈍翁韻

騷壇吳下競謹譁爭說平泉故相家猶有東山留別墅漫從

西府問殘花園林又入春風癭賓主閒消活火茶寂寞稽陰

朱相國

謂文懿公廩

小琅瑯閣半敲斜

嬉春觴詠客無譁九死孤臣尙有家滄海流將才子淚林亭  
開到古時花誰澆山左枌榆酒無恙江南穀雨茶欲問敬亭  
山下路一雙飛燕夕陽斜

秋賦報罷感懷

莫信前身香火因蓬萊多半住平民妻孥雖在非知己天地  
無端養恨人幾見功名星似斗曾經滄海浪如銀西風一夜  
寒于鐵攪亂迴腸萬斛塵

庚申仲春聞警

戀戀君苗硯何年鑄錯成累人長失志與命豈能爭生世無  
恆產頻年況苦兵家貧兼時難天意厭壽生

來

福字綬生蕭山  
人著堰西集

天台道中

筍輿徐度白雲間  
草碧苔青路幾灣  
樹蔭半遮山寺古  
嵐光濃襯夕陽殷  
落花有恨同飄泊  
飛鳥無心自往還  
惆悵飢驅蓬梗斷  
不如桑者得閒閒

殘月

夜色蒼涼迴絕塵  
菱花鏡牘半規新  
癡心願鍊媧皇石  
不補青天補月輪

暮秋卽景

西風颯颯拂衣涼  
細草蒙茸萎夕陽  
老圃秋容淡如許  
一枝殘菊獨凌霜

憶梅

玉照堂前幾樹幽何郎偏自在揚州二分明月憑誰管一抹  
寒雲動別愁應有暗香飄紙帳奈無清夢到羅浮料知月落  
參橫後翠羽啁啾語未休

周錦藻

字心芸號也  
香諸暨諸生

題鐵舟墨梅

空堂月黑凍蛟立槎枒逼人寒欲涇枯管漏洩天地心拂拂  
時有冷香出此時深山盤蟄龍千釘萬玉霜華封高人出手  
弄狡獪能與造化相感通大枝下垂小枝豎墨痕黯澹春無  
主昨夜東風入紙帳萬朵寒花一齊吐滿城桃李無顏色姑  
射仙人自媚孀二樹妙筆今已無此圖彷彿與之俱鐵舟二  
字可屈鐵化爲鐵幹何清癯我對此圖興鬱勃心胸一碧如  
明月讀畫想見作畫人知君脩到梅花骨

白芍藥

羣玉攢成約帶圍當階翻影月華肥莫嫌金紫難消受宰相  
由來有白衣

王樂雖

字孔庸黃巖廩生  
著炳燭齋詩草

浙江忠義錄樂雖元名旭東力  
學能詩文辛酉死難祀忠義祠

寄懷盧西坪

流轉京華久悽傷春月前同心共千里回首念芳年故國叢  
荆棘幽香賦蕙荃何時騎款段重與發輕弦

題濯足萬里流圖

破浪嗟余志未成披圖惆悵說平生  
斬蛟剗兇尋常有一任風波自在行

癸犬行

瘳犬不識桀與堯張牙舞爪聲氣驕自倚高門恣搏噬弱肉  
強食雄晨宵道傍過者不能忍徒手務除三害盡操之過急  
反噬人呼羣亂吠聲狺狺試投一骨遂爭取笑爾氣概原非  
虎世人誤視作戾蟲毒矢強弓大用武食肉寢皮意頗快入  
穴得子計太苦君不見燕市屠沽劇意氣朝烹此輩等兒戲

邵懿瑞

字訊芙錢塘人咸豐己未舉人官刑部主事

郭索歌

郭索復郭索秋來爭踴躍果腹藉稻粱潛形在邱壑自謂世  
無爭伊人劇作惡深宵設明鎗匍匐受羈縛朝來入市履青  
蚨爭傾囊爬羅欲何之煙湯請就鑊任爾恣橫行終將佐杯  
勺潑醋與插薑滿座供大嚼吁嗟人亦然貪貨縻高爵日腹  
饜脂膏宮室居清廓自謂世無爭造物忽相攫暮夜挾金投

身命胥忘卻一朝他魚殃悔恨知何若須知處世危勿取目前樂信口得短歌正言非虐諠

王彥起

原名起字硯香錢塘人咸豐己未

譚獻傳略君先世江南丹徒人曾祖文怡辭翰冠絕海內所稱夢樓先生者也後著籍錢塘學行世其家君有二兄曰堃曰臺並擅文章時比之三鳳君生絕慧下筆千言不自休潛雅隱秀牆宇自潔先以辭賦受知學使張文貞公日以全才少壯工詩兼好填詞書勢雅令有夢樓先生遺風數上公車老而不遇五十餘授會稽縣學教諭以文字山川自娛初君少歲才名起游于四方友教羣弟子多所成就比官會稽尤以掖勸人士為職諸生請業無不鑒飫以去所著

讀史放歌

漢王龍項王虎楚漢紛爭無樂土吁嗟授命天所與安見重  
隨之勇不如隆準之大度成敗論人何足數千古英雄淚如  
雨丈夫讀書貴不羣非元非禪非典墳無使三代而下姦雄



能欺人魏武新莽皆其倫有時拔劍來斫地與爲褚淵生不  
若袁粲死有時白眼聊徜徉與爲醉尉訶不若窮途狂人生  
不朽惟忠孝不然榮辱得失不過一一聽蒼昊君不見奇男  
子人閒少嗚呼常開平不及王保保

古意四首

朱樓大道夾垂楊自許東風著意狂公子珊鞭盤馬路佳人  
繡勒鬥雞場一雙約指鐙前合十萬纏頭肘後囊輸與西陵  
松柏下方塘閒煞野鴛鴦

明星夜夜悵東門蕉萃華顏鏡裏論薜荔哀詞山鬼語芙蓉  
苑內人恩飄零玉玦酬知己漱澱金樽照舊痕聞道長安  
渺西北浮雲極目接高閨

起拂流黃淚未乾經年邊戍憶樓蘭郎情緩緩交河住妾夢

朝朝行路難樂府怕彈朱鷺曲健兒新跨紫駝鞍山南山北尋常地欲采薜蘿舊徑殘

庭前芳樹已成柯不見春來繡轂過但有吹簫諧弄玉可無織錦怨連波荒唐雲雨高臺夢激楚陽阿挾瑟歌莫問明珠曾作檝江南蓮葉奈銷磨

張蔭渠

字矩卿號絮庭錢塘人咸豐己未舉人

許仁杰曰矩卿少孤秉慈訓與叔寅伯兄專亭有一門三鳳之目罹難出險獨居滬江與吳鞠潭合成杭城辛酉紀事詩百首追寫情狀足當碧血錄觀也

和高雋生

飛鴻展翮路冥冥肯向陽侯慙乞靈豹隱恐遭蚩霧毒龍潛不染蜚風腥姮娥持鏡凌虛上鮫女吹簫入夜聽對影欲邀鯨背客酣眠水底喚難醒

董紹舒

原名慎行字敬甫仁和人咸豐己未舉人官工部主事

家傳略敬甫才思穠麗銳於進取辛酉之冬尊人杏塋明經殉難西與敬甫冒險尋父骸出入虎穴竟得改葬如禮顛沛流離卒成其志

忠靖王廟神絃曲

珠宮黼黻琳扉開金猊吐霧薰層臺霓旌羽罕紛紛排葳蕤  
鳳蓋天半來滿酌椒漿斟桂醕雲璈雜奏雲旂舉東西兩行  
列寶炬山魃木魅竄如鼠神之降兮等六鼈杵降魔兮鏡照  
妖閒奏鸞笙歛鳳簫彩龍天矯下青霄萬人一笑色先喜駢  
踵摩肩紛若螳靈香醺謁瑞煙起毒氣呵嗽一朝洗神之歸  
兮振翠旗雷鼓馘兮電鞭施畫絃素管聲參差道旁觀者行  
遲遲旋風颯颯刷塵垢狂夜哭孽魑走父老嗟歎額加手  
游光燿殺亦何有

錢繼祖

字珊舟仁和人咸豐己未舉人官福建上洋通判著珊舟詩草

聞杭城再陷自滬覓舟犯險尋親越十日得信知吾母

健在遂迎至嘉禾之屠甸鎮書以誌喜

危城壓狂寇親舍渺雲端雁足信纔遞烏私情乍寬羹湯謀健婦菽水補餘歡載上高堂酒中宵月正圓

周向辰

號肖巖炳勳子仁和人咸豐己未舉人官分水訓導著摩兜堅室詩草

抗郡詩三輯肖巖幕游台郡佐理軍書以克復太平功敘縣令旋主鶴峯書院改就教職司訓分水時嚴陵寇難初平瘡痍滿目郡伯劉公汝珍留辦善後竭盡心力尋權建德以勞疾卒

桐江道中

歸來海上路迢迢又逐東風上畫橈眼底別開詩境界富春

山水浙江潮

誰教柔櫓響啞啞驚覺林梢隔宿鴉早起不知風雪冷開窗

一路看梅花

分陽道中

行行過舊縣十里離桐江東風禁無力不用帆與雙一雨常  
灌注四山皆崆峒船頭曳長綆直上都盧檣船尾燒黃紙默  
禱神女媧去船不盈尺巨石相摩撞排列如劍戟銛利如矛  
鏃一日足憂悸兩日增驚懣三日忽收霽側身倚篷牕林木  
漸叢雜人語稍紛囂望見塔山塔喜瞻七寶幢計程已不遠  
依然人力扛不聞襖靄聲但聞邪許腔曲折復曲折注眎頻  
腔腔徑欲掉頭去下流乘急瀧疾如箭脫筈歸興何能降

李日章

字闇齋號芝亭仁和人咸豐己未舉人

許仁杰曰闇齋口無臧否有阮嗣宗之  
謹澹榮利重氣節篤友于邦人咸稱之

聞笛

擣笛誰家短短牆數聲哀怨弄新涼催殘鶴夢湘江碧聽到  
烏棲塞草黃書報陽關悽夜月漏遲華屋感秋霜倚樓人杳  
情猶在竟夕相思別恨長

羅學澄

字仲清仁和人  
咸豐己未舉人

杭郡詩三輯仲清覃心經術尤邃毛  
詩辛酉與弟學濬學洙同殉寇難

偶成

向晚閒無事微曛倚竹牀風清天送暑雨過夜生涼  
鐙穗垂將燼瓶花靜有香秋蟲初唧唧聲已應金商

褚榮槐

字適仲號二梅嘉興人咸  
豐己未舉人官龍游教諭

家傳略二梅秉至性篤倫紀與弟少梅相友愛幼有神  
童目官龍游教諭捐俸復書院督課有法以勞卒於官  
著巢隱軒駢文碧桃  
華館詞田硯齋史質

孤山

同治車馬錄金 卷四十五 三  
踞石生涼意看雲悟幻形人聲如答水山影不離亭秋老蛩  
能訴年深鶴定靈梅花三百樹樹樹弔遺馨

七里瀧

五年重過釣臺傍山色仍青客鬢蒼自笑不因名利至秋風  
容易整歸裝

禹城

風動敲山石沙深擁郭門馬蹏迴仄徑鷹眼瞰荒屯地瘠農  
尤惰徭多吏不尊壯懷倚長劒莽莽此乾坤

岱廟

萬峰環擁翠嵯峨咫尺真疑帝座過半嶺深含秦日月一州  
雄跨漢山河指揮雷雨神靈大供養香花士女多手折扶桑  
向西笑蓬萊仙侶近如何

揚州渡江

楓葉冷蕭蕭扁舟急畫橈秋聲瓜步雨暝色海門潮戰血流  
應盡炊煙望轉遙玉簫渺何處清夢正寥寥

馮烈婦詞

女生十八年作婦三百日成禮甫兩月夫以幕遊出奉姑女  
上堂歸甯女在室天寒日短風凜冽半夜鴟鳴聲慘慄夫出  
不安歸抱疾蘭蕙凋其芳鴛鴦失儔匹憑棺不灑淚一死萬  
事畢父母窺女意遣嫗防之密以計促嫗行仰藥甘於蜜飲  
冰茹檠胡爲乎四十二日遽殉夫篋中一紙淚血墨尙恨不  
代夫事姑吁嗟烈女繫何人閔其姓馮所聘字蘿卿名玉瑩  
生於儀徵歿保定萬歲千秋祝吾詠

甲子冬暮薄游滬上張君一山留宿晤蓮生世丈出示



撰箬並題圖送行時將北上感賦五古一章奉禽兼

別一山

一別三十載相見在海角辱君詩二篇感我淚一掬歲月激  
奔湍治亂循轉轂故里熄烽煙告歸收骨肉貧賤無易事俯  
仰兩含怍久遊被飢驅生還轉蕭索歲暮欲何營征帆卸滬  
泓張君總角交

謂一山

招邀遂棲宿邂逅得見君情親忻所託

靜若眠沙鷗閒於守梅鶴盎然詩書味眉宇浮春綠海風急  
暮潮仙人駕樓閣闐然入夢來衣冠太古朴知是唐杜韓長  
跪叩詩學百怪動精魂赤手力捕逐夢醒眎案頭字字化珠  
玉小言何詹詹有筆不敢握出門嬾蠟展展席厭爆竹中慮  
續初謠慰我意寂寞一詩弁我圖隱以孝友勛一詩寵我行  
顯以文章屬今時見古道長歌當痛哭慚汗浹霜裘餘哀銜

風木鐘鼓享爰居錦繡被犧牘覲顏語風雅轉喉多忌觸浩  
蕩江湖閒興到輒有作思求一素心恐污萬青目昔聞造宇  
初蕭蕭天雨粟此意恤儒冠預擬救溝壑讀書復治生熊魚  
難兼欲抱茲甘沈冥逢人但唯諾檐雨逼疏簾窗雪沈殘燭  
春寒戀酒樽夜永遺棋局雄辯氣吐虹狂嘯聲振屋坐閒張  
公子肝膽動寥廓揮涕論時事劍氣相迴薄干戈得暫靖邦  
族幾思復朱履躡何門懷刺日碌碌書生結習深人情原不  
惡不見長門金終盡臨邛醪孔楊通家真管鮑貧交篤一彈  
鍾子琴三泣荆人璞淮樹鬱蒼蒼相別何恩促再拜謝君詩  
魚龍聽夜讀潮落好揚帆離情猶萬斛

楊象濟

字利叔秀水人咸豐己未舉人箸汲菴詩存文存

素細業序略君才氣橫溢有不可一世之槩寇亂作游楚中以書于當事復率鄉勇援廬與賊戰獲捷旣而廬

州陷武昌再陷始無意軍事庚申游皖鄂擬上抽洋稅  
章程大吏許可令君至上海主其事於是湖北歲得洋  
稅數百萬大吏欲登薦力辭旋浙入采訪局及江蘇書  
局且十年性疏狂忤俗人目爲怪卒鬱鬱不得志以死  
嘗慕汲黯之爲人故自號汲庵

答李子遠道悠

作者不可見羣兒自揚揚  
李生吾畏友老筆撐秋霜  
里婦見西子使我走且僵  
敢以邢尹例塗粉矜紅妝  
感君爲導師示我如周行  
癡蠅觸窗紙得出亦俚俚  
驚駭自矜寵終遜騏驎  
良生材信有殊此器甯久藏  
勛哉梗楠質方當構明堂

耨學軒看菊

野人門開秋水曲波影萍香滿幽屋  
秋來叢菊各已花秀絕  
仙姝出巖谷稜撐霜氣矜夕陽高下  
玉英被幽薄欲折仙香  
寄歲寒白衣相約一陶然  
籬根黃蝶飛不到爛漫秋光獨自

看

飲友人齋中

屏盡塵緣獨閉門  
澤鯪羣笑北溟鯤  
醉鄉甲子乾坤大  
草野文章我輩尊  
紅燭清樽春在抱  
梅花明月玉爲魂  
圓蔬取次供新饌  
破屋塵生老瓦盆

食芋一首

并序

天寒漏永每自塾歸大母必爇芋以待有子孤兒尙  
爲老親之累因念鄉先輩錢鐸石侍郎撫於後母遺  
食外塾極豐其師桑叟甫水部語曰若非若母出撫  
若若此若念諸侍郎捧食而泣他日侍郎作哭孫詩  
猶追憶師言云讀書報母當何如我聞且食且哽咽  
然侍郎能以文章學行爲時名臣顯揚其先人人情

不相遠而時命有殊感念今昔愴然作此

天寒凋眾木老圃有蹲鴟結實本根瘁撥爐冰雪姿殷勤勞  
大母寒餓念孤兒樗散成何事徒爲歲暮期

陳其炯

號雪漁秀水人  
咸豐己未舉人

吳受福曰先生與先中丞公至契蚤飲文名顧自癸卯  
中副車後越十六年始捷乙科庚申公車南返逢寇警  
倉黃避亂時東南用兵饒偶中思於馬上得功名或相  
引入大僚幕府薦膺民社先生獨退然任遇不願一登  
剡牘人以  
此高之

春波遺蔭圖爲吳璉軒孝廉

受福題

友恭篤棣華典型式桑梓卓哉延陵胄澤遠貽孫子徙居自  
新安講學來鴛水凡觀舉止端卽知門下士寤寐是鄉樂送  
家春波里喬木蔭十圍鬱茂實根此縣延三百載世遠澤猶  
被遞傳至古邨先生隱不仕容寫方外身律辨曲中理漫讀

遏芳馨嘯歌聊自喜果發潛德光中丞乃崛起始終於兩粵  
政績耀青史時事值艱難半生戎馬裏東南支半壁保障惟  
公恃鈇難讓首功勳名不願紀致身難遂初盡瘁欲忘己遺  
愛名宦留先達鄉賢祀後嗣振孝廉世德述所以繪圖念前  
徽遠從二祖始至今虹橋傍結廬記在是我亦託交末清芬  
厯可指珍重此令名繼繩拭目俟

姚宗誠

字子展號則民歸安人咸豐己未舉人著景詹庵集

縣志宗誠天姿敏異汎濫經史百家于聲音訓詁詩文  
駢體無所不通治古文尤專初由桐城溯震川夷猶婉  
宕動合自然並世之人未能或之先也

### 雨遊孤山

湖光夾明鏡撥櫂向中流一夜過山雨荷花落莫秋言尋處  
士迹策杖信淹留放鶴人何在空亭日夕愁

題秋風破屋圖爲子與

兩椽破屋荒墟間一病鶴住寒可憐冷雲入戶闕秋寥古鬼  
出林吹瘦煙疣筆暝揮六七卷疣琴凍折三四絃出門看人  
不得意往來獨笑滄浪天

九日病中寄友

百年已是無家客九日誰憐臥病身落木蕭蕭聲到枕當杯  
黯黯淚沾巾更無白雁傳鄉訊獨有黃華解笑人知爾登臨  
愁絕處故園西望隔風塵

失題

靄靄停雲入表昏相思南浦幾銷魂記曾共翦西窗燭有約  
重開北海尊芳草綠波湖上路梅花深雪崦中村十年彈指  
尋春地怊悵經遊屐齒痕

陳爾幹

字仲楨號柏堂爾梅弟山陰人咸

汪學瀚傳略君生而穎異讀書過目成誦嘗師事俞先生鳳書爲修身實踐之學年踰冠舉於鄉未幾寇陷兩浙君隻身南返兄弟相繼歿奉母避居遠鄉而身自從軍多所規畫旋因族人延壽獄牽連遭禍莊公鳳戚辭公時兩顧其冤踰年事解游閩督吳勤惠公幕偕入蜀卒於署所著讀書偶記皆心得語詩詞直摯豪邁自見性情屢遭變故多未成編

得家書

昨宵見鐙花晨捧慈母書長跪讀書辭聊當問起居平安字重疊一讀一歎吁母能安簞貧朝夕甘園蔬乃云近日來珍味頗有餘游子作賓客食豈嗟無魚乃云汝性儉慎勿惜錙銖白日堂堂馳寒暑倏已殊欲言隱約之勿言倚門閭反覆書中辭中夜起跼蹐

漳浦謁黃石齋先生講堂



巒合峰迴勢鬱蒼天鍾正氣植南荒君臣分義存千古師友  
馨香尙一堂昭德落成新棟宇繪圖留得舊冠裳恩恩二百  
餘年事瞻拜祠前劇感傷

配享弟子四人皆同殉者蔡春濬  
賴繼謹俱漳州人趙自超侯官人

毛玉潔  
六合人

旌旗草草效前驅大廈真成一木扶鼎足芳名瞿史並戎行  
同志冉樊俱文山慨慷惟知義甯武忠貞只在愚可惜延平  
奇傑士徒營三窟海東隅

出仙霞師數千類皆弟子義民  
兵弱餉乏公亦知於事無補也

渡江咸識局全傾況復義交業素精人到自完天莫強理操  
不易數堪爭聲名詎假勳華重俎豆何關頂踵輕痛哭寒支  
書一筴多應猶未諒生平

砥石平臺蘊莫宣規重矩疊法方圓興亡不惑真知命生死  
皆安卽順天戰壘沙蟲悲劫運名山風雨賸遺編典型敢謂

窮攀挹絕學猶存大易編

洋山磯

一名六百丈  
言其深也

我從江上行飮聞六百丈藏舟入山背洪流見決泝義馭倏  
已西好風來五兩舟人起振舵鼓氣奮一往居人惠行旅巨  
纜投莒紡急流一援手登高得藜杖纍纍蟻緣壁循循蛛結  
網十夫齊噪呼勢爭尺寸上縵絕倏退落十里一俯仰出險  
方入夷心目猶盪漾前途指蜀道奇險記疇曩悠然鄉國思  
輕風盪小槳

辛酉臘月聞郡城陷賊時客遼東

驚心故國滿烽煙萬里思家倍愴然  
深慮已曾知此日言歸  
何事待明年謀身悔未營三窟誤國端由計十全無可奈何  
聊自慰從來月缺總重圓

存亡消息總難知事事都堪入骨悲有幸縱能逃患難可憐  
未憤受流離飢寒已分全家有筋力尤憐老母衰愁絕轉防  
人勸慰到逢人處故舒眉

壬戌初冬至滬海所書感

家山咫尺隔江看到眼滄桑感百端地有烽煙思衽席民多  
疾苦愧衣冠時艱敢謝陳言切腸熱從來避怨難慚愧平生  
累知己綈袍還恤范睢寒

趙之謙

字爲叔會稽人咸豐己未  
舉人善悲憫居士詩贖

潘祖蔭曰蔭交爲詩則非今之所謂詩人也矜此七品官  
也今見其所爲詩則非今之所謂詩人也矜此七品官  
遠過萬里程讀此

二語能無三歎

緝雅堂詩話君以孤憤好嬉笑怒罵詩文皆務爲新奇  
可駭愕坐是不諧于世當代作者亦不能無訾議然書  
畫刻石並卓絕一時記誦亦寔有勝人處固不必以  
體格繩檢之千秋巨眼自有真鑒存而不論可也

六月十八日自閩歸温州興中作

肩輿烈日下直以火繖張慚愧興中人不若輿夫強喘急汗  
雨下竭力踰層岡嗟彼亦何爲千里無宿糧片雲忽挾雨一  
週同奔忙北風招客來高處披襟當息肩相對坐各洗煩惱  
腸天公好調停亦復有炎涼

畫梅作

老幹槎枒酒氣醜疏花圓滿鶴精神空山安用和羹手獨立  
蒼茫攬古春

陳子餘司馬招同王子簡程雲九吉子振飲委羽山洞  
卽和子振原韻

洞天三十六委羽能居二空明不可說窺穴了無異神仙事  
恍惚甲乙誰所記欲入扶幽怪中有九泥置奇聞賤耳食靈

境艱身至道人不解事相惡以爲媚壘石阻洞門築亭侵隙  
地夕陽在屋角四顧失山翠聊吸丹井水一哈呼知味昔我  
遊天台再宿石橋寺路旁蓋竹洞視此足比志俗士強標目  
山僧驚指示無能剔荒蕪豈合益文字桃花方笑人風前弄  
沈醉獨鶴何處飛得無故鄉思且拾方石歸是塊亦天賜

蔡以瑩

字伯生號彥淵蕭山人咸豐己未舉人

鼓山書院喜與剡山接席賦此示季弟瑤圃兼寄仲弟

菊川

同來福地占清閒桃李春風各領班雲展金庭翻峭壁嵎縣東界

溪連石鼓咽雄關剡東關鎖儘容詩唱東西屋可有名齊大小山

憑仗筆花開講席起居縹被慰慈顏菊川主講事花書院家居奉母

蔡以珍

字獻其號菊川以瑩弟蕭山人咸豐己未舉人

題韓佩珊舟行順逆圖次徐沅青都轉韻

天海何茫茫庸人徒自擾順逆懣胸中栗鹿車腸繞獨有慧  
根人朗照扶桑曉隨境得靜觀機心忘物表風橫鷁不前帆  
疾鴻爭矯遲速兩聽之自樂煙波渺余也覽斯圖流感復不  
少利鈍誰所司蒼蒼在荒竊蓬島回天風神仙事虛縹願訂  
鏡湖遊冰心同皎皎

沈文煢

字梅史餘姚人咸豐己未舉人官陝西商州知州

西北行程記東槎詩文東

西日行記西施錄賦琴樹詞

施經常曰梅史藻思橫逸下筆千言值時事不歸忠憤

形于楮墨王成鄉團破賊被獲也歸復聚團兵攻邑城

爲賊所敗乞師滬上不可得病歸時謝敬障山賊大隊

復竄餘姚慈谿鎮海三縣聚聚山北梅史避亂甬東王

小谷太守庚方與張翼伯觀察敬渠楊藻庭太守叔樸

謀復越郡城招兵共事梅史策上虞賊巢空虛若出其

不意以輪船載兵至餘姚蚤夜易小船經梁湖次早可

抵城下被果穴賊必西走以兵尾之必獲全勝張從

之由是官軍克復上虞新昌縣諸賊悉平嗣是至甯河  
至涇陽最後隨使至日本游歷既多著述亦愈富云  
贈王太守小谷 庚

短刀鋸比雪春酒碧於螺眼底逢豪士花間且醉歌一腔心  
血熱雙袖淚痕多爲問東南事聞雞意若何

戎馬逢今日園林憶昔遊隨身明月滿入坐晚風迢斷事誰  
銀手依人易白頭傷心花照眼何況近高樓

和陳柏堂同年

謝幹

同王小谷作

時在始甯軍次

旄頭星落月光寒天海蒼茫感萬端世事共爭蕉鹿夢諸君  
大抵沐猴冠借籌馬背黃金貴欲贖蛾眉赤手難慷慨悲譌  
人莫識腰閒寶劍若爲看

喜晤同年邵子長郎中

緄城

小邨員外

維城

昆季

亂前相送籌江湄亂後重逢喜復悲未有詩篇勞我索獨憐

疏放得君知餘生萍梗成今日故國荆榛豈昔時曾向候青  
門內過堂前秋橘長新枝

春夜與翁已蘭民曹琳趙枚卿比部汝臣慕慈鶴舍人

榮幹小集

此身誰萬古尊酒感平生煙月開春照江湖動遠情客豪能  
說劒院靜但聞笙不覺鄰雞曙遙空露氣清

喜固原收復乙丑涇陽作

楊侯舊築固原城十萬熊羆富甲兵地險不聞猿臂守壘高  
誰縱犬戎橫關中輸餉勞民力天上旬陳動使旌形勢卽今  
成破竹捷書會奏大功成

旅次書懷

獨客江城冬夜長麗譙清角咽寒霜鷹鷂賸啄沈菰白鼯鼠



惟餐敗葉黃離亂漸平愁凍餒山川如故歎荒涼

中朝聞說班聯肅欲往深憂道路長

蔡保東

字于鵬樂清人  
咸豐己未舉人

贈趙益甫同年兼問陳子餘太守

往歲齒鄉薦第三見君名讀君制舉業古氣浩以盈一毛揣  
良驥片鱗測長鯨夢寐欲相見心服鑄真誠明年試禮部上  
章歲在庚辰裝出門去中道忽阻兵鄉園旋遭寇哭社悲風  
鳴頻年值磨蝎羈絆不得行君時客甌海咫尺違班荆乙丑  
烽候息服闋遊上京輦下展良覲握手如平生蓬麻切依倚  
槐橋作弟兄慙然慚些窳深恐作荒僮君不我遐棄愛我肝  
鬲傾大文錙韶濩里耳逃砮矧晒我擊土鼓不能諧琴箏春  
官兩被放君留我歸耕契闊三四年念及心忤忤硯田奉菽

水村學寒燈檠儀徵方觀察葑菲采虛名招我適賓館惠澤  
涵滄瀛且園花木秀行樂析朝醒闐然見君至慰我翹企情  
自云將試吏出山待經營觀察舊相識燕樂歌蒿萃時我慕  
禪悅異說徒紛更感君罄忠告法眼開我盲縱談及時務古  
今參權衡言少務博覽聞道繆南卿散錢得綫索取多用其  
精融貫皆一理鄭許通朱程道學與經濟用達體已明昔服  
君之才才大氣自橫今服君之學學遠氣愈平翰墨盡餘事  
超絕猶錚錚牛刀莞爾笑小鮮何足烹我謂官無小百里綏  
編氓民生苦彫勗培養如孩嬰愛人在學道儒術胡可輕君  
往爲之兆民和政迺成更訪陳太邱途過吾樂清天台去不  
遠曙霞標赤城陳公昔愛吾屢蒙倒屣迎去思日以切寄書  
恨無伴願君致微意升階沐餘榮南鍼在前路卜君天衢亨

行義以達道當爲三代英

儒將篇寄贈諸葛榴生榴生以民團擊賊屢勝賊不敢

過蘭溪

寇氛滿天人帶甲大帥勝人健腰腳尾賊之後出賊前守所  
不攻合兵法赤波膏血吳江流湘水鯨奔據秀州頗牧不聞  
一錢值黃金千兩書生頭書生羽扇家風古不戴兜鍪戴章  
甫連鄉聚作君子營毛錐銛利勝刀斧江浙千里無堅城婺  
州三面風鶴聲繳水截江塹天險風香蘭苴溪流清休說談  
兵僅紙上此才不愧古儒將詞壇舊日飲文名燕中一晤屢  
惆悵宗工巨眼羅英才雋聲高壓黃金臺數筐六星射東壁  
天衢各各騁龍媒君以直言忤眾忌去華何能溷一第奇氣  
磊落超人羣明經不下青衫淚學養深醇經濟優不須科第

傲王侯如此讀書乃有用章句徒重經帷羞驚駘天閑飽芻粟驂駟雲羈逸足偶爾嘶風萬馬瘖羽林猛士頭欲縮尙書督帥冠峩峩連營齊唱解散歌佛性慈悲賊憐閔書生殺賊將如何

淮北聞警南旋即事

忽傳烽火照淮陰一曲迷陽恨不禁貪餌忍毆魚入網驚弓且逐鳥投林短衣躍馬空遙想濁酒澆胸減壯心莫慰顯揚徒跋涉恩量歸去費沈吟

轉瞬前游已十年河梁回首感桑田洗兵擬獻

中興頌玩寇虛糜內府錢且幸餘生逃虎口漫勞骨相說爲肩歸來料理名山業潔養蘭陔樂事全

顧壽楨

初名以文字祖香山陰人咸豐己未順天舉人著孟晉齋詩文集

呂僞孫序略方鄴邑困於兵祖香以寓公爲區畫城守  
麾健兒敗野戰賊旣卻而祖香病病起值母喪以毀死  
其學博才瞻行芳志潔源本於忠孝而伊鬱  
於時事集中如周列士傳幽憂論可得其概

### 君馬黃

君馬黃臣馬白二馬相逢不相識君馬肥臣馬瘦君馬去如  
飛逡巡望塵後嗚呼君馬何无情昔日困鹽車頓足裴哀鳴  
一顧顏爲開再顧身爲輕牽歸持贈君荏苒秋風驚今日掉  
頭去嗚呼君馬何无情

### 聞角

哀角動遙夜霜嚴天欲明未應沈殺氣何苦作邊聲卻敵豈  
無術勤王自有兵憑將此幽意吹繞古長城

### 見雪

沈憂正無計元象驀如斯目斷東軍耗心驚北斗維人皆厭

兵革天忍劇瘡痍直欲排闥闔梯雲一問之

張錫恩

字洛如錢塘人咸豐己未副貢

楊振鐸曰洛如丈刻苦勵學以文章詩賦名設教里門羣弟子多所成就比寇亂避居揚州學者從游益盛

送冠卿六弟

錫元歸里

我爲全家累難經道路長祇堪仍作客未得其還鄉此去通魚信隨時慰雁行臨歧一尊酒相對黯然傷

李

煊

字西岑歸安人咸豐己未副貢著溪上玉樓詩稿

縣志煊少通音律工詞曲風流綺麗與同里陳秋谷丙綬後先輝映平生不妄取與性耽飲酒酣吟興益豪寄迹漁樵間偃蹇終其身

南澗行爲許烈姬賦

有序

姬字德蕢號采白仙子豔而才箸有南澗吟稿及和易安漱玉詞一卷本維揚鄧氏女幼失怙恃其從母

撫育之從母嫁金閭許氏挈姬偕往遂冒姓許不數  
年從母卒其前室子頑而狡鬻姬於青樓投繯遇救  
得不死閉門獨居鴛母亦不之強三吳名士朱鶴峯  
投以詩四章姬愛其才相見於吟花館遂委身焉朱  
君家笠澤之濱有小樓三楹極精雅得姬日唱酬其  
中無何姑蘇陷移家避之洞庭西峯賊踵至驚其豔  
將犯之女大罵賊被賊刃仆猶握石擊賊賊又刃之  
乃死死五日始殮貌如生竟體作香氣馮景亭宮允  
紀其事癸未秋僑寓海上因作此篇

白鸞掃尾銀雲裂萬頃玻璃五湖月瓊魂涼夜踏波歸碧蘿  
衣袂桃花血姬嬾丰姿俠烈腸焚餘蘭蕙轉生香神仙偶墮  
塵凡劫兒女能爭日月光燕城楊柳搖晴翠綠陰遮到珠簾

外豔質前生定是花靈根先世還稱艾曙後星孤句漫裁掌  
中猶有夜珠來采賚雅慕江妃字賦茗爭誇鮑妹才青絲覆  
額韶年小椿樹萱枝零落早巢破難忘翼覆恩慈烏同氣憐  
窮鳥別院梧桐借一枝鏡奩么鳳學飛時苧蘿夜月空尋訪  
豆蔻春風謹護持冰甌細滌吟毫淨淡掃雙蛾對明鏡疊韻  
閒鈔漱玉詞步虛悔簪飛瓊姓空山涼雨溼煙蘿翠袖娟娟  
竹外過已歎寄生同弱草那堪分蔭失喬柯冰霜欲鍊香桃  
骨豈風儘力相磨滅羅網潛藏鴝烏媒籃輿給置鶯花窟素  
頸新添白練痕梨花風雨掩重門恥調玉軫挑司馬怒擲金  
梭惱謝鯤璫蓮鐙影迷香洞蜀鵲唬破鴛鴦夢吹徧東風總  
不溫冰心甘抱梅花凍朱雀門楣舊有聲偶拈湘管賦閒情  
美人畢竟憐名士三寸紅箋便訂盟何須越網千絲結浮家



願廁樵青列輓綠三篙笠澤煙小紅一舸松陵雪鏡中偷寫  
十眉圖七十二峯巒翠有無比似絳雲樓閣上豔情爭說柳  
蘇蕪欖槍忽閃妖星綠鐙前愁對人如玉粵嶠驚心嘯虎狼蘇  
臺轉眼游麋鹿雞犬桃源不可尋窮搜那料入山深青琴矢  
抱千秋節白刃難移一寸心寸心莫道堅非石握石僵眠猶  
擊賊薺葛微聞死後香芙蓉不改身前色紅粉成塵亦可憐  
幾人解詠綠珠篇篋中南澗新詞稿卽論才華已是仙轡軒  
實錄歸南董小家碧玉聲名重始信蓮花不染泥可知芝草  
原無種惆悵江南日暮春摩挲蒼蘚讀貞珉湖波如夢釵聲  
遠細雨汀洲開白蘋

題湯貞愍公

貽汾

琴隱圖

賊未來守而已賊旣來走而已今將軍且如此故將軍奈何

死將軍不死亦不礙將軍不死終不快白日慘淡霜天高  
袖手掣韉中刀出門上馬呼殺賊欲保殘城已無及北向再  
拜何從容翻身躍入奔流中有千人萬人血不知誰拾忠  
臣骨獨留遺像藏名山抱琴枯坐松石閒夜闌展卷對之哭  
陰風吹瘦寒鐙綠

題畫墨梅

西溪春最早花發萬千條流水香於粉翠禽唳過橋疏林殘  
月碧茅店酒旗飄不用羅浮夢吟魂已盡消  
虎山橋畔路攜客記曾經詩夢壓驢背冷香梳鶴翎故人隴  
頭去煙水空冥冥日暮西樓笛淒然不可聽

西湖十三間樓醉題

百尺元龍氣未降登臨幾度泊蘭艘湖光得月化爲鏡山翠

如雲飛入窗居此便稱騎鶴客渴來頻倒鬪雞缸狂吟醉把  
闌干拍驚起柳陰鷗一雙

王星誠

字孟調山陰人咸豐己未副貢著西覺殘草

潘祖蔭序略孟調以家貧遊河南北為書記己未赴京兆試榜發中副車越一日卒其友李蕓客錄存遺草恨全稿不可得或曰在大梁董氏顧不能致也余因陳生瑚士得交於蕓客耳孟調名讀其遺集想見其人恐日久散失為梓以傳

李慈銘傳略君本名章字平子幼穎異目多白眉有奇采成童為文即刻意自異為詩歌鏤心鏤腎見者斂手父學厚以文章名一時少許可顧奇愛君甫冠受知於知府徐君榮學使吳公鍾駿皆第一名大噪予自丁未與君相得君為希有鳥賦以贈于賦大鳴行答之益相親顧以所業相質或上下議諸第幽極眇意氣凌厲農視一世丙辰君始遠遊依其叔父於河防遂歷客中州後令嘗厲書于曰自客大梁始知鄉里之多才而貧賤之可樂也

孫德祖曰孟調為先太夫人族子德祖識字之始君已客中州未曾識面君沒後始得遇三子集於伯寅尚書

已而到河內又得其全稿於姚致堂大令詩雅亦已粹  
行君詩在三子中特幽咽多哀怨蓋境爲之其卓然決  
陳莫能過也

丙辰人日同人雪宴芝村寓園送周叔子

星譽

入都

江村十里風雪昏春船燈火催送人敝裘上座半酒客各有  
萬感叢一身越山蒼蒼鬱清氣前輩風流久凋敝漚堂主人  
真好事獨以鵝文洗寒鄙曲江一醉宮花新翻然歸臥南湖  
春箸書自足娛老母乞米不肯鬪比鄰素箏濁酒選佳勝睥  
睨名流足豪橫同時孫李亦詩傑謂退宜越縷折軸汗駒不能騁  
側身頗瞰橫流高洪鐘所應無聾瞽抗懷已覺古人少入俗  
未免羣兒逃何況烽煙迫飢陳極目關河託哀謳蒼生有待  
斯人蘇文章豈直名山重嗟余落拓輕故鄉行且短劍走大  
梁君今幸假尺寸柄正與天驥資騰驤願君功名蓋當世

下黃金眼中事十年種學道在茲毋爲區區昌其詩

龍山道士法場歌

紅螺吹月夜霧開龍山道士朝天回銀旛金笈肅鸞隊神仙  
恍惚空中來笙匏鏗鏘雜金石羣真叫噉玉靈囂紙灰卷空  
吹復低冰花綵繚綴法衣夜深上座展瓊秘畫燭屏風笑聲  
閑

臨平

上河新雨上蘆鳬小墅春煙叫鷓鴣莫向垂虹橋上望好山  
青處是西湖

傷都督向公

夜帳星辰隕東南哭素旂出身經百戰授鉞感衰年聞道樓  
船返翻愁鐵甕堅壺頭師未捷悵悵馬交淵

過鞏縣杜子美故里

生未入蜀浮三湘十年哦詩筆力僵短鞭瘦馬今日始來經  
鞏洛公故鄉鞏當千山萬山秀俯瞰大河低可肘洞房土室  
迴清奇居者直疑皇古壽公胡年少輕此邱荊棘萬里貪豪  
遊一官閒道奔行在九死餘生哀暮秋可憐數年住同谷拾  
橡采梔日不足醉中罵坐豈初心祇以長歌當號哭當筵倘  
遂捋虎鬚或者成都萬姓焦勞蘇老嫗何物強解事扁舟一  
夜歸江湖西風勞勞鬱林道舊夢溪堂無復到自古詩人屢  
命多當時幕府憐才少獨將幽憤過一生耳聞克捷心猶驚  
兵戈未息公已沒蠻煙瘴雨魂難甯吁嗟天子蒙塵臣客死  
臣有詩歌見臣志直是離騷一片心恨魄相望隔秋水我詩  
未工身已窮時非天寶憂則同云云黃流美人杳思在洞庭

湘水東

洛川道中

一川新水拖藍嫩十里平林淺絳殷好似故人團扇畫祇疑

歸夢到柯山

越縵子嘗有柯山紅樹畫扇光景絕似此閒

曉晴走馬河陽道中

卅里郊原結隊行眼中風物媚新晴平巒過雨青歸樹寒草  
拖煙綠上城隔水稻香禽語妥當風人影馬蹏輕天涯但得  
長如此便倚鞭絲過一生

大河南北郡縣多被蝗而河陽獨無農事方盛可以知長官之賢矣

三山

安坐四月餘漸苦骨節死竭來侍旌從勞轂復當治河津軌  
途息厓側馬足始入山方菌縮下阪忽駑駛谷暄被晨衣巖  
果悅塵齒松樾森四壁嵐光照人紫百轉無一同峰峰出奇

恣局東緣蛇徑陰風冷激矢行人互高下在後失前趾尋聲  
諦言說索景昧往跡讓道喜近古叱馭慚未仕獨愛巖左村  
蓬茅契幽旨窟室樹作門低泉馬擔水木棉交小麥耕織都  
有恃吾心苟志隱勝境卽在是惜哉靈府液重爲利名煮山  
居靜氣多境外人事起白雲自留客投鞭已城市

首陽驛

至性不可做秋風薇蕨新空山窮餓日垂老弟兄身直諫存  
吾道陰符惜故人予方懷仲氏何以弔遺民

陳珊士庶常

壽祺

登第假歸聞道出大梁過訪席上送

別

讀書廿年爭此日射策金門未三十西風千里錦袍秋獻壽  
高堂健猶昔悲君少孤奉母居糠粃蘿屋傳遺書春官數謁



良苦別賴有燕婉能娛姑三日芙蓉鏡中曉看君親製泥金  
報上有百拜加餐飯下言兒貴歸來早藍子花落槐花黃摩  
訶一曲冰絲涼衫巾連臂踏春月毬仗扶頭過夕陽花光上  
酒春心熱爛醉直須三萬日平生一試丈夫豪亂世可憐名  
士拙長年冷粥山廚寒一朝意氣教人看文章有用甯獨是  
富貴逼人如此難我從別君向西走已分雲泥終古剖不道  
天涯落葉堆尙有今宵一樽酒老母倚戶妻停機行矣馬蹏  
無再遲臥龍山北早梅發堂上康強報我知

自輯數年來所作小卷題句其上

擁褐磨磚歲月窮牢騷風雨伴秋蟲讀書太少才難傑感事  
方多悟易通未欲嗜奇終苦寂敢因諧俗遽求主相思欲寄  
盟疆社多恐詩歌近更雄

雜憶

素月銀霞淡處  
工蘭芽生小  
不禁風繡雲山下  
楊花老零落  
東州盛小叢

冬郎慣賦悞儂歌  
梅尉祠邊酒債多  
記得春船扶醉別  
一鐙花雨渡曹娥

竹粉蕤絲二月天  
眞娘墳上草如煙  
思量何事千卿處  
腸斷楊娃未嫁年

四垂羅帳掩春愁  
美玉從來出世羞  
略記年時修笛處  
柳絲前面小紅樓

月子新詞半格傳  
娥娥爭唱想夫憐  
江湖十載填詞筆  
斷句飄零到酒邊

聞江南軍聲大捷喜而不寐

夜火落星旄江聲走賊壕力窮名將出  
恩重戰功高酒慙匈奴血花明日本刀

九重深望捷庶以慰憂勞

反正亦何害雲臺畫李忠酸辛謝妻子慷慨赴奇功屬國尊  
都護登壇拜總戎亟須嚴賞罰東國酒漿空

廢壘黃山暮寒烽赤壁秋瘴深宛馬死幕冷楚烏愁及此收  
天險猶能翦國仇無爲效楊僕頭白始封侯

懷人詩

當代張威伯輪囷表歲寒和平得友廣貧賤著書難短髮年  
年白清詩字字安麻衣墓旁淚今日儻應乾

孫步秀才

落落稱通隱城南第幾人黏頤悲母老捉鼻受妻嗔舊約禽

慶在長年馬肆貧向來飛動意應恨鬢毛新

魯燮元秀才

相如好詞賦辛苦得貲郎  
綸布衣初綠官錢酒不黃  
詩成必

橫絕貧裏獨軒昂幸謝他途進  
于今脫殛傷

周光祖戶部

雲阿老從事五載臥旌旄  
豪健依人拙文章覓食勞  
骨奇知

愛馬淚熱欲磨刀何日手文露  
因成長揖高

周顥孫大令

### 湘夫人歌

秋雨江湖帝鄉隔湘竹叢叢  
楚天色朝雲一角靈旗風  
山鬼伶俜蹋空碧冰絲五十  
湖南歌刺船欲往愁橫波  
山中桂樹晚花落煙外月明  
何處多

### 賒旗店

荒雞喔喔鳴客子作晡食驅車  
入寒楸村落慘無色廛肆尠  
完舍瓦石紛揭礫焦土漸成軌  
已復長荆棘叩門索旅飯  
俯保走逃賊道逢擁衲翁  
相將土鏗側無人念翁老來  
往頗躑

躋牆頭呼老嫗燧火久始得兒幼隨嫗至見客顏貌惜老嫗  
跼判薦老翁行煮麥再三謝粗糲春耕廢廣陌兒郎應團兵  
老人苦無力太息甲丙來荒亂少甯息就如門前路百年聚  
都邑六月燒東村糜爛及魂魄炊爨三千屋搖落不滿百屋  
中無丁壯丁壯均被役稍稍逮細弱雞豚等驅迫所餘眼中  
在後死終一轍日暮風蕭條天陰夜寥寂飢魂與做鬼嗚咽  
嚔向壁少長

高宗朝鋒鏑目未識艱難及星鬢蒙此長命厄我來兵火地  
悲慘已淒惻又聞老翁語淚落更填臆揮杯勸之醉舉醕有  
餘渴破涕重致辭雀躍棄杖策戒我行勿留少留賊將出流  
離愧高意浩歌以爲別嗟彼衰朽年吾生復何極

七陵

洛水湛湛晚欲澠虎牢秋色尙峻嶒年前一剗冬青淚又整  
殘衫過七陵

邯鄲旅店

滿衣塵土晚停車洗腳升堂一盃茶自檢松條蒸粟飯不知  
清夢落天涯

贈登封宰王丹麓並東洛下汪東初

伯樂一顧萬馬暗鹽車髡髻乃有真卽看俗吏浩如海我能  
於畫深知君吾家山水維與宰本朝奕奕尤有人麓臺荆川  
太崛強後來幾輩傳芳芬畫山所貴得山性必有身造方能  
神聞君放衙對二室牀屋未屑收凡雲觀香積翠半奴走天  
風玉女來比鄰癰龍顚顚踞其肘下筆甯願造化喚吾家禹  
穴頗神秀十年跛腳陵秋露石氣到骨心計拙山風吹衣皮

膚皴出門短策走汴泗披髮仰笑誰將倫中朝人物過江盡  
韓陵片石今無存山河污濁誓一洗小夫橋舌疑金根黃沙  
茫茫眼睛死猶能為子開浮塵丹青雖好亦小技願君手挽  
蒼生春墨池涓滴蔘霖雨壽民當與名山均乾坤清氣本吾  
有毋廁齷齪凡兒羣此意人閒會者少為誠問訊窮汪倫

自題畫一首

故屋西頭枕若邪當門一樹蜜梅花何年得向傳鐘院更乞

山僧夜煮茶

吳宗麟字冠雲一字子紱錢塘人欽賜舉人官戶部郎中箬可久長室詩存

杭郡詩三輯冠雲為曉帆方伯子工書能文確守儒素如張功甫之既號佳公子又為窮詩人也

棠孫以所得謝宣城玉印貺余余不敢有因歸之謝介

鶴炳主簿并作此詩賸之

當塗山色青濛濛宣城才氣今誰同三山佳句復何有押尾  
但賸芝泥紅城北得之良不偶竟日摩挲不敢有鄭重教同  
拱璧珍行付公家後人手後人況有句驚人足繼前哲充吟  
寶肘金如斗安足羨但期文雅稱彬彬兩年曾共蘋花社才  
思落筆欽瀟灑我作此詩如拋磚還乞君詩一傾瀉

高英甫茂才

雋元

邀集一粟庵小飲

海上相期作酒賓送春天氣正嬉春好花千朵嬌迎客脩竹  
幾竿閒笑人近局有緣期後續老僧無事絮前因學禪不用  
詩呈佛米汁參來佛亦顰

蘋花社詩

并引

己未冬日諸君集問字亭作消寒會皆社中舊雨也  
漫綴蘋花二字繫以小詩



大酒肥魚號隱淪不堪回首問前塵  
砥礪混玉君休笑我是  
蘋花社裏人

何紹章

字嘯庚錢塘人官江蘇丹徒知縣著小巢居閣詩草

杭郡詩三輯嘯庚少孤彌學從軍滬濱敘官出宰丹徒兵燹後疲瘠特甚詳請減賦民頗德之性伉爽嗜書畫所爲詩氣體雄厚以醞蓄出之

冒雨登石樓山寺用漁洋山人雨花橋看梅韻

暮鐘雲外來不知何處寺密竹隱茅庵  
敲門滿身翠登臺眺  
具區山水何明媚忽覺含暝色微雨從東至古佛負牆隅欲  
證拈花意焚香淪山泉清言發坐次松陰澹短窗梅花散初  
地筍輿下山歸悠悠眷遐思

湯文端公探梅焦麓圖爲趙益齋孝廉

題

文端翰墨照江天司寇風流尙目前  
萬樹梅花一輪月水晶

庵繫孝廉船

包如春

字笑山仁  
和諸生

鍾駿聲曰笑山事親以孝聞與人交  
無急言遽色辛酉之難從容就義

絕句

長日閒門春意舒  
風搖花影忽疎疎  
研朱點墨無餘事  
手撥

牙籤讀舊書

丁兆奎

字松浦仁  
和諸生

浙江忠義錄丁  
兆奎辛酉殉難

題次閑畫竹

大葉疏枝出自然  
亂頭粗服舞風前  
鋪來十丈鶯溪絹  
橫掃

淋漓筆似椽

雨葉風條更露梢  
兩三竿亞勢凌霄  
寫真能寫虛心意  
壓倒

疏狂鄭板橋

李成善

原名鈞字小  
白仁和諸生

丁申曰小白從楊枋園師游年未冠受知  
于姚伯昂學使辛酉之難與其婦高同殉

曝帖

石墨曝須乾風前幅幅攤黑雲翻幾片紅日趁三竿蟬翼防  
污拓蟲涎細剔癢香薰古楠匣室似入幽蘭

錢

詰字笠坡海甯諸生  
著柳陰水榭詩集

家傳略笠坡性孝友少孤事諸父敬弱冠補弟子員性  
冲淡好程朱之學不苟言笑著問心錄寡過篇問心居  
隨筆皆朴實說理暇則吟詠所交多知名士倡和輒騰越其曹卒年七十三

觀插秧

昨夜微雨過田中新水足終日不出門焉能辨菽粟爰作郊  
外遊攜杖出茅屋路逢鄰舍兒柳下牽黃犢相共到東菑踏

破一畦綠村翁騎竹馬手持秧一束卓午笠影圓肩背日猶  
曝嗔彼惡草繁紛紛占饒沃既插亦以芸農事忙相逐父鋤  
子則犁努力去非族人事苟未周日至詎皆熟天下最艱難  
一飯與一粥寄語賢有司政令莫苛酷須念民力艱毋任催  
科促

俞洵慶

字溥臣  
海甯人

廣州春感

東風吹到越王臺雉堞連雲曙色開放眼風塵爲客久關心  
花鳥逐春來黃鸝辛苦從軍曲白馬艱難大將才誰信素馨  
斜畔路有人剛醉鷺鷥杯

聞道天河洗甲兵又傳烽火隔江明盛時孰獻長楊賦春色  
都歸細柳營此日西山多寇盜何人北府壯旗旌五羊自是

繁華地留取笙歌頌太平

何豫培

字墨珊海鹽諸生  
著醉紅山館詩集

家傳略墨珊少好爲詩有脩然自適之意葺別業于北郭之外朝夕吟詠其間胸襟豁如也

題張懋齋撫琴圖

細籟起疏林幽人含意深拂苔坐瘦石泠泠理古琴山風吹  
入松濤清泉流百道相和鳴喁喁小語答空谷孤鶴一聲山  
月明此時天趣誰管領石愈秀兮竹愈靜調高莫謂知音稀  
秋雲深處飛鴻影

畫圖詩

楊柳陰中晝掩門一庭細雨送黃昏自知懶問誰何事檢點  
陰符課子孫

墾得山田一二區只教遍地種春蔬憑他甘旨尋常物只是

黃梁一夢餘

姚

蘇

字更生號十杉平湖諸生

舊雨集十杉少好讀史傳聞習武拔年十七隻身遊燕  
薊癸酉冬隨副將軍楊公赴滑縣軍營黃衫烏帽橫槊  
譚兵將軍奇之用爲千夫長後從某將軍遊獲罪幾死  
者再牧馬山海關外五載而返故自號更生閉戶重理  
故業應童子試補學官弟子其  
詩初則抑塞憤張後歸平淡

喜晤泉南先生

尊俎招邀地主賢

謂揖山昆季

紫薇開到瘦吟天慈悲面目多情

佛瀟灑襟期寡欲仙愁柳當門添畫稿病花滿榻悟詩禪相

逢自覺雄心滅紫塞鏡歌憶少年

溫

豐

字東水歸安諸生箸劫餘詩草

紀亂行

時同治壬戌夏五月作

吾生良不辰遭此兵戈劫庚申二月閒湖郡始告急繼自四

月中蘇常俱瓦裂從此逢禍亂驚惶無虛月殺掠遍窮鄉  
者十之一駭聞驚嘯聲魂自頂顛出恍如熱鍋蟻鑽刺無孔  
入又如沸水魚但在釜中泣欲寫荼毒情沈吟不忍述但看  
闔獻事慘毒相彷彿吾家十一口流離無安宅扶老還攜幼  
險苦備閱歷避亂一身多斯言憶裴說經亂漸死叵存者今  
有七驚憂俱致病羸瘦還嘔血越二年於茲夜眠不帖席今  
春數月來稍得安旦夕此鄉雖少安烽火在鄰邑況兼米大  
貴一升價過百何堪需索苛追呼日夜迫哀此瘡痍民性命  
何能活吾如覆巢鳥身外無一物幸免且偷生太平知何日  
慨念皇古來何代無兵革物盛必有殺天意若定律所以我  
佛子願度眾生厄著爲因果談大發慈悲力是色卽是空不  
生乃不滅安得脫苦海生彼極樂國

王

鉞

字西耕  
歸安人

柳隱叢談西耕僑寓乍浦性嗜吟詠與王克三峻明有二王之目沈浪仙數稱之

客夜

淡月籠高閣憑欄望斗杓雲多山黛暗家遠夢魂遙支枕聞  
歸雁臨風聽暮潮旅懷愁不寐況復夜迢迢

卽事

日長小院畫簾斜手汲清泉試早茶一枕松風春睡足夕陽  
紅過海棠花

九日偕蔣雲巢登獨山

羣岡若屏列一峯聳雲表西風吹我衣木葉經霜早佳節遇  
題糕攬勝探窈窕絕頂縱遐觀下視塵寰小孤嶼枕大荒極  
目海天杳良會興自豪席地酌清醪黃菊插滿頭狂歌驚柝



烏石上其題詩蒼苔綠可埽山下隱茅庵清磬出叢篠一泓沙井泉照見秋容老游興尙未闌樵徑白雲繞行吟取路歸夕陽挂林杪

胡

濱

字石泉鎮海人

養自然齋詩話石泉杜門息影肆力於詩所居瀕蘆江據林木川原之秀時與田父樵叟行歌互答故其詩多清曠之音

初春

日暮出平陸微雨轉初晴徑草恣生意林鳥怡新聲遙峰天末懸鱗鱗頽陽明老樹著煙翠并作山靄輕延矚劇清興小立還前行嗟彼馳驅子役役徒爾營

汎舟詣靈隱

漾舟循平巒轉棹入湖去密柳交危石推篷落輕絮斜篙打

波綠驚鷗四翔翥遙瞻北高峯峭蒨隔雲樹上岸緣厝陰榛  
叢巖芭屢靈鷲開禪關冷泉滌塵慮晚徑暗搜芬言歸惜恩  
遽

晚春

曉霽空庭獨立閒蒼蒼煙靄滿松關一聲嘯鳥萬山綠無數  
白雲相往還

余

瀚字椒雲山陰人  
廣東候補知縣

卽事

平生心力半消磨無限煙雲眼底過昨夜月明今夜雨來宵  
情事更如何

王元智

字愚谷山陰人官  
四川越雋廳照磨

放言

白雲滿甕爲誰開今日劉伶荷鍤來我輩暢懷惟縱酒老天  
難事祇生才身多傲骨貧何礙醉倒窮塗死便埋恨不沖天  
持斗柄銀河倒瀉掌中杯

楊德榮

字華庭聚曾孫會稽諸生著華庭詩鈔

孫德祖曰咸豐中余與從子璿王繼本根仙及君並受  
知桂林莫子嘉師縣試拔置前列時甫成童年相若也  
與試者羨且妬斥爲楊王孫君亭亭玉立儀表魁特兼  
擅詞賦工楷法余尤有珠玉在前之歎楊氏自明以來  
至君二十一世隸博士籍願未有以科目起家者音宿  
胥以玉堂人物目君謂且早達以酬其綏代之抑塞辛  
酉之難不幸困頓以死賴有弟德熙緝堂輯其遺詩刻  
于武林節署追數前塵浮生若夢不材之木得以終其  
天年卒亦未中梁棟至于玉折  
蘭摧不能無天道難知之憾也

途次姚江寄馬明經

翛然孤立恥雞羣顧影相憐獨遇君家有老親休說病世無  
知己敢論文識荆未獻關西劔慕李空懷渭北雲寄語舊時

賢令尹揄揚莫惜齒牙芬

風雨瀟瀟送病魔巴山回首悵如何從頭自問貪歡少蒿日  
偏教受辱多萬里秋高迴塞雁六宮春去泣銅駝請纓莫漫  
愁無路弱冠終軍鬢未皤

謁錢武肅王祠

偉績推唐季雄圖啟浙東禦巢憑警枕破浪懾疆弓萬戶城  
披錦千秋觀表忠滄桑無限恨流水自潏潏

漫興

金爐香燼思無聊斜倚書檠破寂寥一點孤鐙人欲倦小樓  
微雨聽芭蕉

秋夜書懷

淡月千林照濃霜萬瓦鋪惱人惟雁唳伴我有狸奴酒冷塵

襟浣鐙殘客夢孤誰將慰寥落空自憶尊鱸

聞蟬

旭日臨高樹閒來嘒嘒音一空箏笛耳頓觸蕙蘭襟客思驚  
元鬢晴光漾綠陰蜩螗羹沸後時省垣告警有幸聽清吟

寄某

世閒解小不平事者有酒觴世閒解大不平事者有劍囊我  
無一石五斗量更無絕藝超中黃鄙懷縱抱不平事抑鬱惟  
有中心藏吁嗟乎塵世相尋胡底止劉阮不生賁獲死視今  
視昔兩茫然睥睨千秋終老矣

白蓮花

愛到光風霽月天生涯淡泊也安然消除色相常依佛洗盡  
鉛華合慕仙浣暑幾人清夢破描香有影素波圓相依秋水

勞洄溯爲盼冰魂擬放船

婁業煊

字東輝承澧孫會稽人

夏日襍詠

靜中鼻觀自聞香一院槐陰日正長  
山雨曉滋落逕綠池荷  
宵度水風涼敲棋劇有消閒法覓句聊爲消暑方  
最是北窗  
容偃臥依稀清夢到羲皇

王

澍字雨菴會稽人官廣東雷瓊道

過維揚有感

烽火東南接飄零況轉蓬  
星沈牛女次人老亂離中  
風雨歸舟急鶯花廢苑空  
歌筵一回首衰柳滿江東

周人吉

字藹士諸暨諸生殉難襲雲騎尉箸尺蠖居吟草

雨過

雨浙輜軒續錄

卷四十五

婁業煊王澍周人吉錢守初

奏

雨過晚晴天閒階對月圓貪涼枕苔石人影共花眠

秋夜

新來消瘦不勝衣話到千秋事已非絕愛梧桐弄疏月無人  
且自理琴徽

拒賊富春石板嶺屢挫其鋒十月六日賊眾四合勢且

不支賦此言志

殺賊不盡可奈何吾守吾貞志不磨熱血一腔終灑地千秋

心事付山河

按人吉即於次日死難

錢守初

號湘秋嶽諸生

王紹祥敘略湘秋爲可山先生嗣胚胎

濡染學有根抵運思深遠造句清新

呂岳孫同社詩錄湘秋生道光丙戌於吾社爲最長性沈靜寡交游博聞強記文才敏贍碑版之作援筆立就詩尤工手定稿三千餘首足以蒙矣

言其學以足致實用者為主不喜爲攷證故訓之學時  
與甘泉毛鳳枝友善鳳枝學爲攷訂君嘗笑之日子才  
可爲博士使吾得志將以書局任君然心折鳳枝不置  
云吾不善毛君之所爲實吾之所不能也嘗謂鳳枝曰  
顧祖香之文余既序而槩之倘余不幸誰爲訂吾  
文者卒年五十二鳳枝爲校刊其詩文曰豫齋集

### 送友人謫塞外

三疊陽關曲送君萬里行風沙平大漠柳色斷邊城老作投  
荒客詩多出塞聲相將一樽酒悽絕故人情

### 大荔途次

終年事行役勞勞何爲者蹊徑寂無人敝車策驚馬朔風號  
天空白日寒原野墟里黃蒿閒飢禽時復下誰能拯斯民歎  
息淚盈把

### 寒下曲

沙磧迢迢接塞煙崑崙山畔月輪圓將軍傳箭擒生虜萬馬



無聲夜蹋邊

漢陂

追悼祖  
香介卿

菱葉荷花舊漢陂  
扁舟曾約泛琉璃  
岑參兄弟今何在  
雷雨蒼茫又一時

宮農山觀察

爾鐸

出守延安貌叱馭圖以自況其攬轡

慨然之意蓋可想見余時客鳳翔寄此奉題且送其行

靈夏兵氛莽不收  
金湯城外陣雲愁  
從前韓范經營處  
付與籌邊百尺樓

匹馬縱橫蹋北山  
馳驅報

國不知難男兒欲上凌煙閣  
先借丹青畫裏看

重九懷仲桓叔弢兩弟

風雨作重九飄零王粲樓關河橫斷雁天地入深秋弱弟因  
貧散他鄉老客遊插萸誰更健悵望暮雲愁

登望河樓

樓勢凌城郭清秋發浩歌西風吹太華斜日渡黃河陝樹臨  
關斷秦雲入晉多生平懷利濟憑檻向滄波

童大野

字古畬  
山陰人

陶潛宜曰君于咸豐十年冬以部郎隨中州某公于浹  
溱陽與兀魯特錫綬俱成潔陽廣唱集一卷明年十一  
月又偕隨錢唐某公按事隨右成西輔載筆一卷二人  
蹤跡終始同之君詩全集未見錫綬字漆缸詩亦別無  
行本均藉此以傳

塞下曲

疊疊愁雲繞塞山征入到此幾時還鄉心自託灤河水萬折  
千迴總入關

風陵渡

岡勢環蒲郡雄亘接漢京路迴官渡闊山盡大河橫隔岸千  
峯出安流一葦輕欲尋風后墓津吏未知名

出塞

野曠無人跡脩然度使車朔風連大漠秋色冷邊沙莽莽胡  
天闊漫漫戍路賒不知程遠近已趣漢甥家  
邊郡趨河朔雄亘界賀蘭沙平千騎合風勁一雕盤荒戍短  
長堠邊烽赤白丸簡書遑我恤未敢息征鞍

秦中紀事

坐困孤城望救遲太阿倒執柄全移非關狡兔工營窟聞說  
多魚有漏師東道主難酬燭武西風塵欲障元規驂驢自向  
天涯老還爲蒼生一繫思

王錫康

字念齋會稽諸生  
著一笏山樓詩草

由第一泉至齋臺寺二首

錄一

來訪齋臺寺春湍響不停遙岑開積翠古磧出空青水月靜  
塵鏡雲泉養性靈有禪談不得恐被老龍聽

湯學洙

字魯泉號守拙蕭  
山人候選知縣

陶潛宣曰君爲相國文端公從孫少負壯志奸談經世  
之務寇氛熾入貲爲縣令思自效咸豐辛酉九月賊陷  
蕭山將東犯郡城君集團勇截擊于錢清不利死之  
卹贈雲騎尉所著自如軒詩凡四卷盡散佚其子彬掇拾殘  
編得三十餘  
首藏于家

蠶婦吟

蠶家三月婦女忙邨邨陌上提筠筐腰支痠損垂垂柳欲照  
菱花慵舉手朝來但拜馬頭孃夜雨低眉愁簇涼山棚繭成  
翁媼喜繰車咿軋綠陰裏一寸新絲一寸心寸絲不上蠶婦

襟明朝又約鄰家女同出城南賣絲去

勞銘之

字劍齡餘姚虞貢官建德訓導著誠成齋詩

讀明史

李震金牌寇賊知韓雍銅鼓遠威施帝欽鄭氏彰家範人快  
徐階改獄詞理學不妨櫻嫚罵廠臣何德享生祠班班淑慝  
歸清議蜚語妖書亦太癡

沈

貞字默安號緩齋餘姚人著半讀書屋詩存

山家

破屋荒涼起暮煙閒花野草滿平川空山無物留雲氣明月  
多情照澗泉臥改新詩宜枕上偶拈幽事話尊前忘機漸可  
馴麋鹿始信巖居別有天  
兩浙輶軒續錄卷四十五